

世祖惠莊大王實錄

第九之十一

(B) 4
1114



163741

1953.12.15

國立臺灣大學圖書館典藏
由國家圖書館數位化

世祖惠莊大王實錄卷第九

九月壬戌朔 中宮幸本宮○世子疾久未愈 上命禱于園

丘宗廟社稷○癸亥宗親議政府六曹堂上書筵官等來問世
子起居○大殿中宮還景福宮○世子卒于本宮正室世子羨容
儀溫良恭敬好學又善楷書 兩宮哀悼侍從者臣無不慟傷

初世子病索紙筆書古詩風雨無情落牡丹
階紅藥滿朱欄
明皇幸蜀楊妃死縱有嬪嬙不喜看一絕以示侍疾者人憂其
詩語不祥○左議政鄭昌孫左贊成申叔舟右贊成黃守身判
中樞院事權掌吏曹判書韓明澮都承旨曹錫文同副承旨鄭
軾等會于朝啓廳議定喪制設斂殯國葬造墓三都監○甲子
哭臨發哀宗親及文武百官俱以素服烏紗帽黑角帶詣本宮
入就位外庭
排位通贊唱跪在位者皆跽通贊唱俯伏哭在位者俯
伏哭十五舉聲通贊唱哭止興平身在位者哭止興平身通贊
唱鞠躬再拜興平身在位者鞠躬再拜興平身奉禮引宗親
及百官出○宗親百官詣景福宮以白衣烏紗帽黑角帶陳慰

于兩殿○停朝市五日○禮曹啓諸道陳慰以所聞先後進箋又啓曰臣等謹按禮為長子期南史齊武帝為文惠太子服期朝臣齊衰三月文公家禮以期為三十日以總麻三月為七日我朝報制日數准此請依此制大殿中宮白衣麤布帶三十日朝臣白衣烏紗帽黑角帶麤布帶七日外方戍禦武臣外大小使臣諸邑守令文移到日於公廳設香案以白衣烏紗帽黑角帶麤布帶望京再拜哭十五舉聲又再拜七日而除王世子內外親一依元典白衣烏角帶則七日而除若無服之親依百官例官官表服三月從之命斂用王者冕服壙內諸事悉倣山陵以河原君鄭守忠為守墓官左承旨韓繼義代奠官○命名兵曹判書洪達孫都節制使楊汀為大將統察闕內軍士○襲用七稱設襲奠斂用十九稱設小斂奠百官於本宮外庭哭臨襲奠儀小斂大斂成殯奠儀同饌品同有司設禮饌以進內侍傳捧入設於屍床東設香爐香合并燭於其前雖非時夜則終夜設燭從倣此又設尊於戶外之左置盞三於尊所代奠官時承旨盞手盞手盞洗設於中門外後

此做升自東偏階詣香案前北向跪三上香奠酒連奠俯伏興退

九奉香奠醑酒主喪以下哭盡哀○命於海陽大君諱宗及

元孫避居處供饋如舊而勿用司饗房膳羞○乙丑議政府六

曹會于朝啓廳請進膳御札示之曰無以死傷生子豈不顧

大計哉但食不下咽故稍稍進粥耳况予氣本強雖五六日不

食固無恙深感股肱之忠予與中宮各飲酒一盞又食粥○大

斂用七十稱百官哭臨殯于本宮西廳守墓官鄭守忠侍墓官

官申雲括髮哭盡哀如儀○禮曹啓謹按南史齊武帝時文惠

太子薨有司奏朝臣齊衰三月南郡國臣齊衰期書遣官弔衛

司既是王世子僚屬乞依此制常時朝路著白衣烏紗帽黑

角帶殯宮侍衛入直日及葬時侍衛著衰服裏布紗帽從之○

世子嬪往本宮世子攢室○丙寅議政府六曹問安自是日至

初十日而止○議政府左議政鄭昌孫等請移御昌德宮不

允○命都節制使洪允成授大將象牙牌為左廂大將○命漢

城府尹李純之世子左弼善任元濬往揚州大方洞相王世

宗

子墓地○右議政姜孟卿左贊成申叔舟知中樞院事朴董僉

知中樞院事金吉通同副承旨鄭軾等會朝啓廳議造墓諸事

○世子嬪及侍女守墓官侍墓宦官乳媪速古赤別監書筵翊

衛司服喪服如儀成服儀內侍設嬪以下位於內庭通禮門設

喪主侍墓宦官速古赤位於嬪前設書筵翊衛司位於外庭時

至內侍設奠於靈座前應服者服喪服女官引嬪以下就位奉

禮郎引至喪以下就位通贊唱再拜哭嬪以下女官贊喪主以

下再拜哭盡哀通贊唱哭止代奠官三上香連奠三爵退通贊

唱再拜哭嬪以下女官贊喪主以下再拜哭皆盡通贊唱哭止女官傳

同贊嬪以下還次奉禮郎引喪主以下出○丁卯聚諸司品從曳

出新鍾于慶會樓門外將以改鍾銘也先是命知中樞院事朴

董中樞院副使金漑鑄大鍾作小閣于慶會樓之南懸之至是

命於光化之門右構閣懸之○漢城府尹李純之左弼善任元

濬書雲副正安孝禮等往廣州果川等處相王世子墓地○

禮曹啓朔望奠儀有名日其日清晨內侍捧魂帛函安于靈

座時至內侍進饌於靈座前兼行主喪及守墓宦官書筵羽衛

司於庭下俯伏哭盡哀興再拜主喪升詣香案前北向跪三上

香酌酒奠于靈座前連奠俯伏興退復位俯伏哭盡哀興再拜

訖各還次朝夕奠儀每日清晨內侍奉魂帛函安于靈座時至

日出朝奠內侍進饌於靈座前主喪及守墓宦官於庭下俯伏

哭盡哀興再拜陞詣香案前北向跪三上香酌酒奠于靈座前

連奠俯復興退復位再拜哭盡哀還次食時上食如朝夕奠儀

夕奠畢內侍捧魂帛函入安于靈寢主喪及守墓宦官於庭下

俯伏哭盡哀還次薦新有新物則薦之如上食儀若非時薦之物則於朝夕

食奠及上○戊辰御札下國葬都監曰大抵今葬禮祇人君之

葬而諸事似為過當若壙內諸事當極厚若壙外諸事則雖予

之葬必薄之矣徒煩民無益於亡者宜知此意太半減損以故

懿墓石作儀象略與卿相等○慶尚道觀察使李克培進嘉禾

三穗者三莖二穗者七莖上曰甚可笑也○司僕寺提調啓

京畿江華長峯島牧場曾放胡馬別取孳息身在壯兒雄馬并

四十六匹內請揀出五歲以下良馬十匹送京其餘雜馬三十
六匹北一鎮江兩牧場各送八匹令監牧官監放毛國報本司
以錄馬籍 從之○禮曹據宗廟署呈啓顯德王后權氏神主
及儀物已曾撤去其誥命冊寶并粧具令該司收蔵 從之○
設王世子初齋于津寬寺○己巳命召左議政鄭昌孫右議政
姜孟卿左贊成申叔舟右贊成黃守身判中樞院事權擘吏曹
判書韓昫澮會于朝啓廳將李純之等所見山形圖議王世子
墓地○傳于承政院曰寡婦孤嫠率多削髮為尼則尼者實窮
迫之徒也故予欲復立淨業院聚居完恤且如跛蹇不堪步履
者至窮可哀三角山野處丐食無賴飢民何以得遂其生其體
予意布置○諭忠津全羅慶尚道觀察使曰聞本道失農初欲
遣大臣巡問更慮使命有弊且委卿一方豈待別遣想必荒政
畢與宜考前送救荒事目曲盡措置毋使匹夫匹婦飢餓初以
吏曹判書韓明澮為下三道都巡問使往賑飢民會世子卒 命
停之○吏曹據慶尚道觀察使啓本啓今年旱既太甚禾稼憔悴

救荒最難若遞秩滿守令則新舊交代荒政必弛請慶尚道及
忠清全羅道守令秩滿者限來年仍任從之○庚午御慶
會樓東偏房台都承旨曹錫文右承旨尹子雲議事錫文等啓
曰 殿下一身所係至重久進素膳臣等恐違調攝 傳曰子
氣本強雖不食肉無傷也○傳旨義禁府曰學生朴信妖言惑
衆其推鞫以啓信自言於軍器監前忽見戎行四十許人乃亂
臣成勝成三問等也皆下馬跪俄而又見一人擔青袋後至又
跪曰願不見雷公神之父不幸得逢前藝文提學尹士昫以其
言聞 上命承政院招問信曰果有是言蓋信因世子即世
大內憂傷欲以禳術干進故作誣言如此云○辛未司諫院請
瑜置法 不允○御思政殿引見日本國總官府源勝元使者
者等二十餘人諸宰樞侍使者獻書契無他為來之事 上疑
其為中道偽作然終不形言倭人及諸宰樞皆出左贊成申叔
舟進前獨啓曰瑜顯犯大逆斷不可赦且去年李壇等以魯山
為名而為之今瑜亦欲挾魯山君倡亂魯山君亦不可安居也

上曰議政府必舟來請將更議施行凡叔舟所言上無不允
俄而領議政鄭麟趾左議政鄭昌孫吏曹判書韓明澮來與叔
舟啓曰瑜之謀逆非一朝一夕所由來遠矣向在京聚兵謀逆
罪固當誅况今重犯大逆事關宗社非殿下所得私赦今
誅止黨與元惡漏網甚為不可請并置法傳曰有遼太祖故
事卿等之言不可從麟趾曰遼夷狄不足法也今日之事當法
周公耳若賜死得保首領足矣且魯山君為反逆所主不可安
居傳曰魯山君已降封錐廢為庶人可也若瑜事不敢從踈
遠如李甫欽尚蒙恩宥骨肉之親獨不可宥乎且瑜之謀逆實
由窮迫而然豈宜深罪麟趾等啓曰瑜屬籍已絕不可以骨肉
視也其在順興府多畜酒食服用金銀之寶用如泥沙不可謂
窮迫也反覆懇請竟不允曰吾當商量大司憲金連枝左司
諫金從舜等亦啓曰如此大逆非所商量上猶不允○命鄭麟
趾姜孟卿申叔舟韓明澮黃守身權學李純之鄭軾任元濬及
風水學魯穆安孝禮元龜曹秀宗往漢江渡南相王世子墓地

孟卿等回啓曰臣等所見諸山皆不可用獨漢江渡南得一亥
坐金山可用麟趾獨不可曰此山山隨水走左不回抱斷不可
用更擇好處魯穆如羣議孝禮秀宗如麟趾言 傳曰予常從
衆明日若晴則當親幸細看卿等可從我麟趾因啓曰人君雖
父母之喪率哭則進肉若遇疾病雖未卒哭猶當進肉况今以
尊臨卑請進肉膳 傳曰不忍也○設法席于世子攢宮○壬
申諭咸古道都節制使郭連城曰卿遠勞鎮邊苦甚想塞上寒
酷賜宴慰之仍賜貂裘卿可領受以微物示情而已卿亦可進
鷺羽糜角又野人酋長等世居後門為國藩屏宜加撫恤今遣
宦官尹得富慰撫之卿悉此意依前年故事備酒肉以同封名
目招致宴慰如有不來者招其管下送酒肉並宣予意今去名
目外又有可招撫者卿斟酌招饋之野人上送節次事目亦宜
看審施行又諭咸古道觀察使咸禹治曰念卿馳驅諮諏之勞
今遣尹得富設宴慰之卿其一歡○癸酉 上渡漢江駐馬于
沙平院東臯相前日姜孟卿等所啓之地 上揮羽扇曰至脉

散亂氣不歸一斷不可用也遂下馬小停進香醞 賜隨駕宗

宰軍士酒遂 命領議政鄭麟趾左贊成申叔舟吏曹判書韓

明澮漢城府尹李純之同副承旨鄭軾學前校勘房文仲風水

學安孝禮元龜曹秀宗往 獻陵右議政姜孟卿右贊成黃守

身兵曹參判具致寬右副承旨權執弼善任元濬率風水學魯

穆往健元陵相世子墓地 還宮○議政府左參贊朴仲孫刑

曹判書朴元亨戶曹判書權導禮曹判書李承孫請進肉膳

不允○鄭麟趾姜孟卿等回啓曰兩 陵傍近皆無可用處引

見任元濬安孝禮元龜等問之孝禮曰臣於昔日見果川清溪

山麓有東走一山可用 上細問形勢曰明日當往觀焉○吏

曹據兵曹受教開啓京畿楊州平丘驛廣州德豐奉安慶安楊

根娛履砥平田谷白冬川寧楊花驪與新津安平忠清道忠州

可興等驛屬附近京畿左道水站判官掌治稱京畿左道水站

轉運判官兼程驛察訪其餘長林黃江連原吾川阿川留春等

驛則去水路遠不可并屬水站連原則仍屬京畿忠清道程驛

察訪京畿吾川阿川留春及忠清道長林黃江水山及黃江所
管諸驛亦屬京畿忠清左道程驛察訪楊州雙樹仇谷加平甘
泉達洞等驛屬京畿江原道程驛察訪桃源道所管諸驛屬京
畿右道程驛察訪重林同化兩道所管諸驛屬京畿忠清右道
程驛察訪忠清道利仁時興金井三道諸驛合為一道稱利仁
道栗峯增若兩道諸驛及在前京畿忠清左道程驛察訪所管
槐山仁山驛陰城甘門等驛合為一道稱增若道慶尚道昌樂
安奇兩道諸驛合為一道稱安奇道幽谷長守兩道諸驛合為
一道稱長守道金泉沙斤兩道諸驛合為一道稱沙斤道省峴
黃山兩道諸驛合為一道稱黃山道台村自如兩道諸驛合為
一道稱台村道全羅道濟原藝樹兩道諸驛及在前藝禮道所
管高山玉色驛水保道所管樂安樂昇驛景陽道所管淳昌昌
新驛玉果大富等驛合為一道稱藝樹道藝禮鷲谷景陽三
道諸驛及青嚴道所管長城丹嚴驛珍原永申驛水保道所管
寶城可申波清兩驛與陽陽江等驛合為一道稱藝禮道青嚴水保

兩道諸驛及藝禮道所管臨陂蘇安驛咸悅才谷驛鶯谷道所管
扶安扶興驛金堤內才驛古阜盈原等驛合為一道稱來保道黃
海道麒麟青丹兩道諸驛合為一道稱青丹道俱革驛丞置程
驛察訪其察訪考察條件續議施行 從之○甲戌 駕幸果

川至仁德院東相魯穆安孝禮等所言山勢曰左右龍虎回抱
規模頗佳更 命鄭麟趾申叔舟韓明澮李純之鄭軾率風水

學魯穆曹秀宗往廣州相墓地○琉球國使者道安辭○日本
國對馬島主宗成職代官宗盛直各遣使來獻土物○乙亥

命右議政姜孟卿右贊成黃守身兵曹參判具致寬左副承旨
權摯弼善任元濬前校勘房文仲率風水學魯穆安孝禮往高

陽相墓地○忠勳府堂上有司朴仲孫權躡忠翎司堂上有司
魚孝瞻等啓曰今 命停祝壽齋但凡供具已輸山寺請行之

從之○別侍衛朴孝麟啓曰臣昔日於楊州見有山宜安墓
命左參贊朴仲孫率風水學李承旭與孝麟往相之○鄭麟趾

姜孟卿等復 命麟趾曰廣州治東有山可用孟卿啓曰原平

之地有東走一山可用傳曰當先往原平相之次相廣州○設
世子二齋于津寬寺○傳旨義禁府放遣蔣仁孫所告安城住
李貴先等○吏曹據禮曹開啓咸吉道濬源殿直諸陵直或用
不解文字或用貧窶不潔者非惟不宜焚香埽除之任至不能
讀祝文今後令本道觀察使於子弟及土官知印生徒中選解
文可當者薦望且殿直有殿最而陵直獨無亦令殿最從之
○丙子 駕幸原平相姜孟卿所啓之山 命安孝禮泛鐵于
古塚上占定方位任元濬啓曰此塚必古善相者所定如用此
山當用此穴孝禮曰此山坐亥今年未可用議不決賜 扈衛
宗宰及軍士酒還宮 御札傳旨兵曹曰隨駕衛將無宣傳標
信而妄稱宣傳令軍士下馬既曰宣傳則宜速奉行而更稟於
大將且無知甲士搜穢於 駕前而宣傳官等不加訶禁並推
鞫以啓○傳旨司憲府曰今九月十五日行幸時西部學堂儒
生不侍立其推鞫以啓○日本國對馬島宗盛直肥前州上松
浦鴨打源永各遣使來獻土物○丁丑宗親議政府六曹請進

肉膳 不允○御慶會樓東偏房引見左議政鄭昌孫右議政

姜孟卿左贊成申叔舟右贊成黃守身判院事權學左叅贊

朴仲孫兵曹叅判具致寬都節制使洪允成漢城府尹李純之左

副承旨權摯右副承旨金碩同副承旨鄭軾左弼善任元濬風

水學魯穆安孝禮曹秀宗等議前所相果川原平山勢 上曰

予不審所謂主山者玄宮之上落脉處為主山乎逶迤出龍虎

外十餘里有高峯則以此為主山乎元濬穆曰落脉處為主山

純之孝禮曰山脉起來最高處為主山議者紛紜竟未歸一致

寬因啓曰牛者生民耕食之所賴而我朝牛少馬多請以諸道

牧場兒馬換牛放閑曠水草俱足之地使之孳息金碩曰長生

殿陝隘請補以答字 上曰予欲除弊勿為之叔舟曰功役甚

少 上猶不允仍留昌孫孟卿叔舟守身擊仲孫碩軾命臨瀛

大君璆挂湯君增飲之○傳旨禮曹曰予為亡哀追薦無所不

極庶可寬懷尚念惠不及窮民條列于左一復立淨業院給奴

婢三十口田地一百結俾僧尼為得活之所一諸山丐乞之人窮飢

困之至死無恤之者誠為哀愍或其中有逃竄避役者或嘯聚成羣甘為無賴者官家所當區處兵曹勿急追捕使致自惑令山直見上項于人徐諭撫恤之意率到本曹曹尋族親及本主保授救恤數加考察無族親及本主者授東西活人院救恤每節季啟聞一殘疾篤疾尤為無告之民盲人則既設明通寺聾啞蹇躄之徒令漢城府廣覓保授東西活人院優恤每節季啟聞其以此知會該司○義禁府啟僧惠明告僧義田以宋經等八十九人錄名書來示且言將復有閔伸之亂今旱甚欲立上王者有之又崔旱兩義田等言旱曠太甚上王立則未穀茂盛又潭陽鄉吏官奴等聞國家以手搏試才爭相聚集為手搏戲陰揀勇士惠明本與旱兩義田有隙以謀舉大事誣飾進告罪應凌遲處死籍沒財產兄僧海簷給付功臣為奴 命斬惠明勿坐海簷○日本國西海路一歧州護軍藤仇郎子司正也三甫羅來獻土物上松浦九沙島主藤源朝臣次郎關西啓肥後州瀨高郡守藤源武曆各遣使來獻土物○戊寅 命鄭麟趾

姜孟卿申叔舟黃守身具致寬李純之鄭軾任元濬前校勘房
文仲風水學安孝禮魯穆元龜曹秀宗等先越江以俟駕以兩
停行幸 命注書賈御書馳諭麟趾等曰今雨故停行幸來日
三更動駕向江卿等牽相地者速往看山使人及於江西箭串
之野通其善惡曰某山為上某山次之某山為下予當擇而往
看卿等亦宜及來通衢以探行幸向處○御慶會樓東偏房引
見兵曹判書洪達孫都節制使揚汀洪允成都承旨曹錫文左
副承旨權摯右副承旨金礪議相地事錫文啓曰長湍故邑基
臨津瑞國洞俱有山可用且麟趾等今日往利川川寧等處看
山則今日必未及回來前日所相山未可用而徒勞 聖體臣
意以為分遣大臣及風水學通觀諸山擇其可者駕幸 上允
之即以書諭麟趾等曰前諭云卿亦宜及到衢路以探行幸向
處今更思之道遠故卿等未能及到矣姑停今日行幸卿等可
細看明日內還京啓達 命左叅贊朴仲孫判院事權摯大司
成安知歸率風水學金敬孫方繼忠往審長湍臨津等處○御

扎下兵曹曰予惟命將授略以囑一方生靈之命其所以任之者豈不重且大哉顧以將帥無權故士卒不畏將既無威功何由成自今分水陸軍以都節制使為陸軍大將處置使為水軍大將增權益威以責成效爾兵曹速奉施行○義禁府啓學生朴信欲以符術干賞作妖言以惑衆聽至發于上切害之言罪應斬籍沒財產命減一等施行○諭咸吉道都節制使郭連城曰本道富寧青巖等處居住野人中武才卓異可備宿衛者精擇錄名以啓童興孫斯速給駟上送○己卯 御慶會樓東偏房引見知中樞院事朴薑都承旨曹錫文左承旨尹子雲左副承旨金礪議造墓事上曰禮大夫二月而葬今若以沍寒欲待春和則非止五月將逾七月矣薑曰石灰功役甚繁恐不及期 上曰增給役夫何如薑曰古人用灰隔本以鏹木根也然築之不牢萬一水漏則臣恐留積成濕 先王山陵時臣等然焉灰隔一事於臣心至今未滿上令藝文館考灰隔故事○御書曰成均館養育人材非一朝可成又非人人皆用雖有材而教不動則不成雖有人而試不預則

難用是故常激勵而數試之以為登用之備此其大旨也予承大
亂之後庶務紛紜未暇興學育才然而學官無一人陳者甚非國
家建學委任之意今後每月季錄書生所讀書以聞予將親講焉
○設法席于世子櫝宮○傳于承政院曰予於教育儒生委之學
官無所勸勵深以為嫌念諸生書籍難得令衆誠之錄藝文館所
藏書將以刊行都承旨曹錫文曰校書館有五經板子官為印賣
成均館書籍亦多教官宜隨諸生所無授之○庚辰以朴薑楊汀
洪允成知中樞院事金何判漢城府事金淳吏曹參判黃孝源戶
曹參判李純之柳洙中樞院副使安崇孝仁順府尹金連枝漢城
府尹金世敏司憲府大司憲鄭守忠河原君金鈞奇虔行僉知中
樞院事李好誠慶尚左道兵馬節制使柳洙右道兵馬節制使○
命戶曹判書權躡風水學魯穆前校勘房文仲往相楊根薇垣知
中樞院事洪允成正郎高台弼風水學安孝禮相交河原平判院
事李仁孫風水學金敬孫元龜相龍仁○吏曹啓新設察訪考察
條件一察訪褒貶令其道觀察吏一依平安咸吉道察訪例一察

訪非因公差所管諸驛外毋得越行一懶於職事不法貪污侵
虐屬吏者觀察使及憲府無時糾覈有犯者即行罷黜察訪察訪
專掌驛路諸事觀察使毋得兼任他務一察訪巡行時用馬四
匹私與人驛騎或給草料粥飯文以病驛路者痛懲一上項條
件於曾設察訪處並令行移他未盡條件令兵曹參政曾降教
旨施行 從之○傳旨義禁府放忠清道木川付處金仲廉○
吏曹啓景泰七年七月初四日 傳旨節該衿川果川合為一
縣以衿川為治所今照京畿觀察使啓本欲以果川縣為治所
但自果川縣西南至仁川府西北至陽川縣各五十餘里東至
廣州僅十里偏據一隅道里不均衿川之民稅糧詞訟往來有
弊請仍舊以衿川為治所 從之○辛巳議政府六曹請進肉
膳 御書答曰本期年服也一月甚小焉以易月之制而行三
年之喪者從其實情故復古制今以易月之制而行期年亦無
妨也以從實情而復古制也予心猶欲行期年今請肉者不思
之甚耳月既幾矣無容再請○御慶會樓東偏房引見都承旨

曹錫文左承旨尹子雲右副承旨金碩議事○命尹師路饋鄭
麟趾申叔舟承旨等酒于承政院且令食肉麟趾啓東小門外
箭干地面有坎山若明年用之甚可請 親覽○壬午 駕幸
箭干相山還宮時道經軍營見侍衛牌呀處甚卑濕即招闕下
慰之曰夏潦何以寓居 命置板牀左承旨尹子雲請繕工監
主役 上慮官吏督役之弊令其牌頭掌之○傳旨司憲府曰
今月二十一日行幸時成均館儒生不侍立其推鞫以啓○設
王世子三齋于津寬寺○命衛將魚得海捕城中盜得二十八
人令刑曹義禁府鞫之有七十歲翁辭連逮繫 上曰罪疑惟
輕况此老人無現賊乎即保管○癸未 御慶會樓東偏房引
見都承旨曹錫文議事命申叔舟金淳風水學魯穆房文仲往
相杵川仁川等處黃守身李克堪風水學金敬孫元龜相廣州
金何魚孝瞻高台弼風水學安孝禮相高陽○日本國對馬島
宗成職遣使來獻土物○甲申忠勳府於北義寺忠翊司於寧
國寺設祝壽齋諸功臣私辦○黃海道觀察使李禮孫遣檢律

啓私奴石山亂言 上御慶會樓東偏房屏左右引檢律親問之云石山嘗道遇海陽大君奴亡乃等問所之亡乃曰吾將魚物換易綿花故往爾石山曰今東宮不辜禁用魚肉爾雖往無所用也且言桃源君誤封世子不死而何又必有害海陽大君者矣 上曰真亂言也即 命承政院馳書于禮孫曰石山具枷械令軍士十餘人押送其元告仲敬及證聽石昆亡乃等給駟上送○諭黃海道觀察使曰本道荒田多而人民稀少今聞自他道至者甚衆予甚喜焉其中有願仍居者咸吉江原平安道人外勿令還本且錄軍籍給復三年具數以啓○諭慶尚道觀察使曰道內海印寺印經諸事本欲務從簡便無弊就功然事之煩簡功之遲速在任事之人今舍宇造成造紙造墨役僧役民皆事之大者至如菜蔬鹽醬器皿供費之物徵收之間慮或病民况當救荒緊急之時任事者如或不念弊將難救卿與敬差官體予至懷斟酌便宜弊不及民以副予意○傳旨義禁府放咸吉道永興充軍李成龍○乙酉停 誕日賀禮○賜造

紙所鑄字所司礪局工役人酒又賜闕內入直軍士及鑄字

所官負酒○沃川人郭瑜上書曰農為政本食乃民天有子曰

百姓足君誰與不足故民食固不可不裕也然欲民食之裕又

不可不先於務農而務農之要惟在於灌溉之利也恭惟聖

上軫念務農之源屢降諭書廣求灌溉之術守令訪問可作堤

堰之處民皆隱而不告者有損其膏腴之田而終無其利故也

何以言之其大堤大陂則已矣在先有奪民膏腴之田築少堤

貯水暑當春耕之時雨澤饒洽則不資堤堰之水灌溉自足後

有天旱則堰內之水與堰下之地一時俱乾有損其田而終無

其利故民皆不樂也然秔稻之性旱耕水種則其根已深故雖

有旱而不枯幸有雨露終見收成乾種之則根不深入故遇旱

則枯故水種不可不務也嘗觀梁氏論水利之要云暑十畝而

損一畝以為井則九畝可以免旱乾百畝而損十畝以為池則

九十畝可以資灌溉方今每於民田泉濕之處當秋冬之交皆

因其舊隴而加築為堰高可三四尺以儲雪水而作池及其春

耕之時決其水而灌堤下之田而播種隨即耕其堤內之田則
上下皆用不損一畝而灌溉之利得故人樂為之也臣於今
年以此術試之臣之水田無泉濕之處臣田之上有他人泉濕
沮洳之田誘掖其人加築其隴以儲雪水至於播種之時決下
其水溉臣之田水耕水種雖經久旱亦不枯槁其實不下於豐
年其他乾種之田皆為枯槁以此知稍田水種為上也且川
防之術不無其要亦嘗不量其地勢水勢之高下而為之故但
有力役之重而終無其效也臣今遇下詢堤堰之術不忍緘嘿
敢陳瞽說儻以臣言為可採俾小臣一試之則其防川築堰之
術臣當竭其心力而為之 御書曰予欲得留心民事者各試
其才日夜思慮只此耳非獨此也雖小小之務有人陳之者誠
以為喜冀一分惠民之政而况國家之大本乎速給駙徵來予
將來春試任之必有效矣○刑曹啓本官奴秃同典農寺奴尹
生等欲謁魯山君至賫膳羞必有情由請拷訊 從之○傳旨
刑曹放忠清道牙山充軍速古赤白雲敬慶尚道醴泉充軍速

古赤金致謹○丙戌 御後苑觀射命上護軍金守溫直提學
韓繼禧射候守溫繼禧發二矢 賜守溫段子裘衣一領弓矢
毛馬粧等物永膺大君琰桂陽君增密城君琛義昌君玗左贊
成申叔舟吏曹參判金淳都承旨曹錫文右承旨韓繼義右副
承旨金磧等待射○日本國肥前州平戶前寓鎮肥州太守源
義遣使來獻土物○丁亥 傳于承政院曰中宮氣弱必須食肉
故勸之予亦將食承旨等令司饗房進肉膳○初咸吉道富寧
人前護軍金致富等上言請於茂山置邑革富居以屬之 命
兵曹議之兵曹請令其道觀察使節制使審定便否至是據觀
察使節制使啓本啓石堡乃梁永萬農所洞三歧伊洞徐得明
農所洞新營洞虛水刺洞崔連洞等六處賊路要衝且鏡城會
寧兩間使客經宿支待之地故置富寧府前此謂地不宜稼而
青嶽古富居民往來路遠又與茂山堡地近不宜置兩衙門
以故移置於古富居之地甚為不可今當革富居於石堡置邑
稱富寧都護府置節制使兼治民事茂山則革節制使擇勤謹

者定為權管防禦其古富居青巖等處居住軍卒令間一月番
戍且會寧南羅耳甫東洞釜回還之地前已割屬富居今請仍
屬富寧府 從之○戊子 上御後苑觀射臨瀛大君璆永膺
大君琰桂陽君璿義昌君玘翼峴君暉河城君鄭顯祖左贊成
申叔舟判中樞院事權擊兵曹判書洪達孫知中樞院事陽汀
洪允成朴薑兵曹參判具致寬承旨等入侍 上出繡囊曰鄉
等中候者得之朴薑連中郎 賜之右承旨韓繼美連三中賜
內廐馬一匹 賜叔舟達孫薑致寬曹錫文鹿皮各一張○日
本國管領遣使來獻土物一歧州護軍藤仇郎亦來獻土物○
兵曹啓在前有服親及三王后族親逆兒職除授時受職當否
敦寧府磨勘啓聞後叙用今已革敦寧府請有服親則宗簿寺
后族則族親內尊屬解事人磨勘啓聞後叙用 從之○初慶
尚右道兵馬節制使俞益明啓臣曾為蛇梁萬戶今為都節制
使於倭人入寇可疑處悉嘗觀覽倭人之釣魚孤草島者必依
蓮花欲知兩島汲水而行蛇梁與此兩島相對通望賊所經由

在當嚴守今以蛇梁兵船移泊所非浦最緊之處反為空虛是誠可慮况所非浦連陸遠於海門候望不通若倭寇伺便潛入依柯島則聲息難知備禦無由固城泗川晉州三邑南面賊變可畏宜當不見是圖臣羅將所非浦兵船還泊柯島且左道丑山浦烏浦漆浦包伊等浦防禦不緊量抽兵船二三移泊柯島固守要害之處以備不虞慶尚道觀察使據知世浦船軍金得禮等狀告啟本浦東南無島嶼江口虛闊有風浪則船易敗頻年改造非唯役費又不合倭人瞻視玉面浦則三面山高遮塞浦內窄狹所泊兵船只容四五且與玉浦最近不宜更泊船如助羅浦則賊徒密邇其為要害非知世浦之比而兵船只八請革知世浦所管軍人一千二十內抽四百名屬知世浦以至應接釣魚倭人之事且巨濟島民居在海中倘風水失利雖有賊變咫尺不能以船相救若騎兵則易以赴援請於知世浦營基築石堡依兩界口子例以所非浦船軍三百作馬兵分三番更戍萬戶常時巡行示威伐謀有變則犇後且蛇梁兵船移泊所非浦雖

有賊變晉州泗川固城三邑枕海居民救援無由柯島雖云絕
島勢似孤危然扼居要害內護三邑之民外觀倭人之變實為
緊要之地請以知世浦軍三百二十名屬虵梁泊舩柯島以固
防禦並命兵曹議之兵曹請令三道都巡察使審度便否啓聞
至是據巡察使啓本啓巨濟縣永登玉浦知世助羅吾兒等浦
兵舩過多然永登玉浦則乃與熊川薺浦相對如門戶然內救
外援俱為便益若知世浦近南助羅浦極南內地諸邑相距遙隔
海路尤遠但各守所在無他救援之望又船泊處多沙石下碇
不固浦口虛闊若有大風舩易破請革罷知世助羅兩浦以其
舩軍四百名屬玉浦防禦在前知世浦所管釣魚倭人路引收
稅等事並付玉浦且巨濟縣海中絕島脫有賊變內地兵馬涉
海救援無由雖多設水軍萬一失利賊得下陸則守護軍一百
名勢必不支請於知世助羅浦中間築石堡置口子萬戶以兩
浦革除軍人六百名屬之為騎兵分四番防戍又於助羅浦北
峯知世浦南峯別置候望待變岼恭浦則正當柯島之北唐浦

赤梁中央要害處依陸泊船來往赴防便易若柯島則水路三十餘里至為孤絕遇有風浪軍人不得如期番戍因有糧盡之弊且東有唐浦西有赤島雖不置軍賊勢不能經入泗川等處若於所非浦西南兩峯別置候望則可以通望海路所非浦則仍舊泊船加置軍卒防禦 命又下兵曹議之至是兵曹啓一依啓本施行但慶尚道並海防禦最緊船軍不宜減數助羅船軍並屬薺浦知浦世船軍元數一千十九名內海邊居佳六百名屬玉浦其餘分屬所非赤梁又於巨濟縣南助羅浦西邊塲門依前築石堡以本鎮軍人輪番候望 從之○己丑傳旨禮曹曰今後 文昭殿薦新外勿進蟹○庚寅諭咸吉道都節制使郭連城曰聞野人等多往中朝者然不能居中國矣不能數朝貢矣亦非反此而去彼也邊將慎勿防護撫育妻子如常來者接待如舊若見野人當諭國家撫育接待如舊之意亦勿強諭○兵曹啓東西班員兼宣傳官若部將者並兼銜下批從之○冬十月辛卯朔 御札下司憲府曰交河縣監閔忠源

違法濫刑而隱諱不啓諸邑守令必多濫刑而監司罔聞知予
無知之之理是君不君而臣不臣也豈獨交河縣監之過監司
之罪也其推覈以聞○壬辰 上御慶會樓東偏房引見刑曹
判書朴元亨兵曹參判具致寬右副承旨金礪議向化野人犯
法事仍 賜酒礪啓亂言事 上曰近日亂言者頗多予從實
典宥而不殺若不置法亂言不止慈愛而不用法是梁武帝而
已予當斷以大法礪啓曰亂言之人非止亂言實則謀逆不可
不置於法○御書諭咸吉道都節制使郭連城曰所進鴟鵂中
一連兔鵂也大抵鵂之類顯名者三第一松鵂第二兔鵂第三
鴟鵂此三鵂中雜交而生者名曰庶鵂名雖各異而實則一類
故或有體色相混未易分辨者雖老宿鷹師自云我知而不可
全信何也能知衆所知者而必不能知衆所不知者矣今後小
有異色異貌之禽慎勿輕棄須即謹送○御書傳于內需所曰
內需所自以為非外官凡所傳施行事不察虛實只聽宦官之
言今後一如諸司下 傳旨後乃行有所啓稟則呈單字于承

政院或承傳宦官○是夜召雲城君朴從愚都鎮撫朴元亨等
于承政院議野人馬金坡老歐其叔童亡乃夫妻之罪○司僕
寺提調啓諸道牧場馬匹羣聚累年踏損因此雜草不盛至於
孳產兒馬亦至劣弱以故曾立法云凡牧場或四五年或二三
年互為陳荒以待草盛還放比年以來寢不舉行弊復如前如
洪州大山串順天白也串珍島一所海州延平島晉州興善島
等牧場馬匹後年點馬時盡令驅出分放他處限數年陳荒以
禁樵採如有違法濫耕者並罪守令司僕寺提調又啓忠清道
瑞山安眠串牧場水草俱足故擇放良馬且造船之材皆由此
出而塩夫閑雜人入處斫殘松木又縱私畜與官馬混處請刷
出安眠居民徙泰安禿津串禿津串所放馬匹移放于安眠串
及他水草俱足牧場皆從之○癸巳諭咸吉道都節制使郭
連城曰今見本道觀察使移刑曹關文知馬金波老歐傷其叔
童亡乃罪固重矣然禽獸之行何足誅責且坡老本來自謂不
下於亡乃故國家並除職今卿當以予命召金波老亡乃等語

金坡老曰爾受子都萬戶亡乃受子中樞之職尊卑固不如也
且亡乃爾之叔父而歐傷之是不畏國法而又不畏子也嘗殺
無赦然汝等皆子所愛護且地遠情狀難究故特赦汝汝可贖
於亡乃以相和解悔過自新後勿復然使金波老知其罪亡乃
雪其憤可也又金佛生歐温稱介固有罪矣稱介牧馬佛生殺
田亦不為無罪卿宜依法輕重決罪不使生怨野人之事不可
一一如法令後不得已事外勿取決可從權處置而後密啓○
以吏曹參判金淳加嘉靖大夫崔恒戶曹參判黃孝源中樞院
副使曹孝門禮曹參議李克培工曹參議兼慶尚道觀察使金
幹閔憲行僉知中樞院事○傳旨吏兵曹還給故及第金訓告
身○設法席于內佛堂○甲午 命禮曹參判李祐之率風水
學魯穆安孝禮往相揚州豐壤等處○日本國對馬島護軍井
大郎來獻土物○乙未 親傳宗廟冬享香祝○御思政殿臨
瀛大君璆桂陽君璿密城君琛延昌尉安孟聃工曹判書沈澮
都承旨曹錫文入侍 上呼臨瀛進酒謂錫文曰臨瀛質實人

也被服不為華飭有儒者氣像又呼增謂曰爾好潔衣服自以
為美然實不及臨瀛仍命增傳于史官當詳記此言增上
之寵弟也凡發號施令出入起居未嘗暫離仍謂錫文曰昔唐
太宗云我有三子一弟所為如是我心誠無聊賴子獨有臨瀛
永膺子亦心無聊賴然唐太宗為元吉言耳汝知子言外之意
乎再三問之錫文俛伏唯唯上曰卿等出去○丙申駕幸
豐壤免院等處相墓地賜隨駕宗宰及軍士酒○日本國對
馬島宗成職遣使來獻土物○丁酉御忠順堂觀射宗親及
領議政鄭麟趾左議政鄭昌孫右議政姜孟卿左贊成申叔舟
范川君權恭坡平君尹巖吏曹判書韓明澮兵曹判書洪達孫
知中樞院事楊汀洪允成同知中樞院事奉石柱漢城府尹李
允孫仁順府尹唐衮行上護軍河友明金處義李行儉承旨等
入侍命分耦射侯召兼成均司成金鈞金末金新民率儒
生赴闕上親抽講籤進生負崔璘等七人講所讀書令鈞末
新民等問難璘講春秋城中丘一節論至時屈舉羸上問其

義璘對曰比年水旱相仍民不聊生今令下三道辦大藏經五十件時屈舉羸莫甚於此 上曰政府臺諫無一人言者汝布

衣生敢言之志可嘉尚予將大用仍 命進酒 賜諸生酒肉

上又御慶會樓下臨瀛大君璆永膺大君琰桂陽君增麟趾昌

孫孟卿叔舟朴董汀恭巖等侍○司憲府啓安李聃欲奸七寸

叔申自衡妓妾楚腰輕往自衡家直入房內自衡妻李氏驚走

墜地季聃索楚腰輕不得至歐婢僕狂妄薄行甚為無狀請杖

八十收告身發配遠方以戒後來 命只杖八十○戊戌日本

國對馬島宗成職肥前州松浦丹後太守源盛各遣使來獻土

物○禮曹啓議政府六曹進香王世子儀忠勳府忠翊司進前

一日奉禮郎設位於外庭如常其日清晨攸司進禮饌入設於

靈座前設香爐香合並燭於其前奠祭文於靈座之左設尊於

戶外之左置盞三於尊所奉禮郎引政府六曹堂上官白紗衣烏

帶角入就位奉禮郎唱跪俯伏哭堂上官俯伏哭奉禮郎唱哭止

興再拜興平身堂上官哭止興再拜興平身奉禮郎引班首升

自東偏階詣靈座前北向跪奉禮郎唱跪堂上官跪執事者一人奉香爐一人奉香合跪進班首三上香執事者奠爐于案執事者以盞酌酒授班首班首執盞獻盞以盞授大祝奠于靈前連奠班首俯伏興少退北向跪大祝進靈座之左西向跪讀祭文訖班首俯伏興平身奉禮郎唱俯伏興平身堂上官皆俯伏興平身奉禮郎引班首還本位奉禮郎唱跪俯伏哭堂上官跪俯伏哭奉禮郎唱哭止再拜興平身堂上官哭止興再拜興平身奉禮郎引堂上官出○己亥 御思政殿受常祭視事命左祭贊朴仲孫禮曹判書李承孫燕成均司成金鈞吏曹參判金淳講生負白勛等四人書仍 賜酒○義禁府啓瑜自順興安置後有異志賂記官仲才品官安順孫金由性安慶強安孝友軍士黃綴辛克長鄉吏金根安堂金恪使仲才之子好仁招舊奴鄭有才與其徒凡三石丁石仇知凡伊及豐山官奴李同共謀起兵使各帶兵仗又遣府使李甫欽金頂子珊瑚笠纓且言公近日必為堂上官甫欽不受瑜言當以別日贈之及聞

魯山君下寧越給言乳母小非蹴吾妻子吾乙亡幾死邀致甫
欽及中才請訊之因謂曰主辱臣死予豈坐而待死請公聚兵
與我今夜直攻榮川榮川不應則軍法從事即向安東安東吾
家僮聚居之地可得二三千兵以此誦令誰敢不從遂錄節制
使處置使諸邑守令教授官姓名拔劍劫甫欽署名令吹角打
鼓促取印信軍器以紙付仲才發牌字聚軍自作誓文曰姦臣
用事誘掖宗親放黜主上 社稷顛覆同心匡救如有二心天
地神祇 社稷宗廟之神日監在茲與甫欽仲才同署要盟遂
贈甫欽頂子笠纓及段子衣仍索堅甲甫欽辭以無有瑜更請
安東鐵甲與甫欽議云今遣豐基郡事於行嶺聞慶縣監於草
站使截上京之路其來者勿拒則本道從仕者願戀妻子靡然
而來仍集軍士成事不難甫欽嘗假稱鎮穰遣盲人石敬於瑜
所說瑜曰前朝王子自少為僧免禍者頗多又問僧懶夫曰瑜
終於此邑乎將還京乎懶夫答曰有虛蒙相甫欽以語瑜瑜言
予以桂陽君之故得罪而來近無存問事有難測汝亦可畏汝

昔與瑤相知適今作宰此邑而予亦來此今時則不問有罪無
罪坐之甫欽曰靖難時事機嚴急間有不問而抵罪者矣瑜與
甫欽謀逆明甚其仲才好仁有才石丁凡三石仇知凡伊李同
順孫由性屢強孝友黃緻金根克長安堂金恪俱各承服皆凌
遲屢死依法緣坐籍沒財產 上從之命順孫黃緻由性屢強
孝友克長屢斬勿緣坐甫欽金根杖一百流三千里金恪杖一
百安堂杖八十石敬勿論時犯罪者多無知小民為姦人誑誤
情涉疑似者亦有之 上下照律狀于議政府議之皆以事干
及逆未敢輕議率從重典左贊成申叔舟曰 上意豈欲多殺
人宜原情定罪以是多所全活 ○傳旨禮曹曰昭格殿道流及
書題每四孟月取才置簿受職去官晝數憑考施行 ○刑曹據
忠清道觀察使啓本啓全義住百姓崔難金面語本邑守令云
前縣監李慎壓良為賤而暴死今汝食公廩受人囑托決訟不
公行當受禍其橫逆如是不宜仍住本邑請依曾降教旨黜鄉
澗宅 從之 ○庚子彗星見 ○御思政殿引見日本國總官府

源勝元使者禪和子乾珀護軍藤仇郟等 命饋于賓廳○承
政院啓瑜既為大逆不道不可不置於法 傳曰不忍殘其骨
肉耳○司諫院啓曰瑜前日特蒙 上恩得生所當改心易慮
今又謀逆至於發兵得罪 宗社一國臣民不共戴天者也宜
置於法請至再三皆 不允司憲府啓瑜逆謀暴著李甫欽又
黨瑜請論如法 傳曰瑜則今已斷之李甫欽踈劣賈於瑜耳
○議政府六曹啓瑜之謀逆其黨皆已伏辜瑜以首惡不可獨
免請賜死 上命桂陽君璿傳曰依遼太祖故事赦之更啓遼
何足法今日所法周公耳瑜之始反若正典刑必無今日之事
若復偷生安知後不如今日乎 傳曰踈遠之人恩貸者尚多
豈於骨肉而不然乎啓至數事 傳曰予將商量日暮大司憲
金世敏左司諫金從舜等更請亦 不允○辛丑遣吏曹參判
金連枝中樞院副使金守溫奉表箋如大明賀正兼獻白黃鷹
鷓鴣○右議政姜孟卿知中樞院事朴薑同副承旨鄭軾啓前
日所定原平墓地壙基狹小斷不可用即 命停役○大司憲

金世敏左司諫金從舜等啓瑜既首惡斷不可赦臣等昨日進啓未蒙俞允終夜思之如此大逆豈可商量 傳曰子當議諸大臣卿等勿促○議政府六曹啓臣等昨日請瑜罪 傳曰子將商量臣等以為瑜狂悖雖置邊郡嚴其禁防必無所懲宜置於法 傳曰當與卿等面議○壬寅 御思政殿受常參視事都官正郎崔濬輪對濬曰凡奴婢文券偽作者頗多雖或暴露經赦則免故無所忌憚茲偽日滋請勿論赦前罪之 上曰既赦之何復罪之濬又曰山郡之民生長山間不諳舟楫一朝驅為水軍故水軍有名無實請以公海之民為之 上曰爾言是○臨瀛大君璆桂陽君璿左議政鄭昌孫戶曹參判崔恒同知中樞院事朴炯奉石柱都承旨曹錫文左承旨尹子雲左副承旨權摯右副承旨金礪行上護軍李埤李行儉吏曹參議李克堪等侍食昌孫啓曰瑜為至親臣等已審 殿下貲之之厚意然國家大計固不可如此 上曰吾未一定耳仍使璆昌孫恒以次進酒 上下座受之命璆以大盞罰承旨等先是 上謂

承旨白崔恒喪畢入京當送人迎之都門外至日承旨等忘不以啓故罰之 賜瑆昌孫克堪鷹各一連御後苑觀射瑆瑄炯石柱錫文子雲摯埤行儉兵曹判書洪達孫府尹康袞侍射錫文石柱中候賜鷹各一連 上謂諸將曰去年殺韓信今年殺彭越子為漢祖不取也又謂禮曹判書洪允成曰卿三殺雖不得皆中必須二中而後謂之豪傑允成即連中 上曰真豪傑也爾孰與郭子儀李光弼賢允成曰 殿下出唐太宗之上臣何屈二臣之下乎○諭咸吉道都節制使曰野人往中朝者不可防遮亦不可疑貳依前諭書撫接如常可也然近境居人往來他國不可不知某人以某事率某某人某時發去續續詳悉聞見啓達且中朝招誘使之往朝乎野人等以自意往朝乎并聞見啓達但須秘密不可使彼知其深候聞見自生疑惑也又聞兀狄哈等聚兵似欲作耗亦宜廣其耳目以知其謀豫為之備然不可先自騷擾也○命鄒麟趾姜孟卿申叔舟黃守身韓明澮朴董李純之鄭軾任元濬率風水學魯穆安孝禮往相

豐壤○癸卯大司憲金世敏右司諫徐居正等上疏曰書曰殲厥渠魁又曰除惡務本誠以誅亂討賊必嚴於首惡也瑜於往者身犯大逆宜伏顯誅得蒙 殿下私恩獲保首領尚不改惡施聚鄉隣無賴之徒積以時月黨援已成將刻日舉事其為罪逆滔天極地此正天地 祖宗之所共怒一國臣民罔不痛心刻骨思食其肉而不已者也近日支黨皆伏其辜瑜以渠魁反朕於法舉國驚駭自古及今豈有大逆不道不揆之以法者乎 殿下縱念親親之息不忍加刑然於天地 祖宗之意何一國臣民之望何固哉 殿下所得而私之也瑜之有二心非一朝一夕 殿下若斷以大義早置於法豈有今日乎今日得逃邦憲又安知不有後日乎此臣等之所以反復陳達請置於法者也 殿下曰商量臣等不識誅討亂賊有待於商量乎伏望殿下決決無疑割息正法以副輿望臣等又按春秋之法必先治其黨與今李甫欽以其黨與得全軀命尤所痛憤乞令並置於法以正邦憲御書不允○命姜孟卿黃守身韓明澮朴蓋

李純之鄭軾任元濬率風水學魯穆安孝禮徃相交河高陽等處○臺諫闔司啓臣等既上書請瑜罪未得蒙 允及覆思之痛入骨髓宜速置之於法以副一國臣民之望啓至再 御札示之曰古今蒙宥者非獨瑜也 不允○夜三鼓姜孟卿等回啓曰今見高陽治東都摠制鄭易墳其山可用○傳旨吏曹曰鄉雅樂本非二事而各置署齋郎樂生武工額數猥多且各有適兒有費無益今後雅樂署屬典樂署其工人適兒之數磨勘以啓○日本國管領遣使來獻土物○甲辰幸高陽縣蜂峴觀鄭易墳令任元濬安孝禮魯穆房文仲等卜定向背又 命桂陽君增鄭昌孫姜孟卿申叔舟黃守身及諸宰樞登峯眺察皆以爲坤作艮山 上然之遂賜諸宰樞及侍衛軍士酒 上登案山之麓觀山勢房文仲陳三年行一步法及順山順水之勢 上曰文仲貌稍似鄭守忠其為學也亦不減守忠○全羅道全州地震降香祝行解恠祭○乙巳命召左贊成申叔舟兵曹判書洪達孫參判具致寬令都承旨曹錫文議達達聲息

及兩界松江築城事叔舟等啓急遣通事於遼東探問聲息若
築城則宜來春始役於是引見叔舟等議置鎮諸事○諭平安
道都觀察使元孝然曰今送知司譯院事金有禮可差正朝使
護送千戶送于遼東又諭孝然及都節制使柳河曰今因謝恩
使先來通事咸仲良聞遼東等處有達子聲息同封兵部從備
文字卿宜看審秘密布置○大司憲金世敏左司諫金從舜等
上疏曰易曰履霜堅冰至言事之不可不謹始也始之不謹則
終將難救瑜本瑑之腹心謀危 宗社非一朝一夕瑑之伏誅
喻宜同坐 殿下特貸而不諭瑜之亂心於是益長前日潛結
將士睥睨圖亂罪惡尤極 殿下宜斷以大義置之於法只令
放黜於外妻子飲食衣服之奉無異平日彼何戒而懲艾乎其
在順興施財聚人黨與亦多彼皆烏合終必自潰萬一得售其
謀殺一二守令蜂屯蟻聚盜弄潢池之兵則寧不軫國家之憂
乎瑜之犯此大逆至再至三不容小貸者也 殿下之又不能斷
何也 殿下以私恩廢公議曲全瑜命其能保後日之不及

乎臣等竊恐萬無此理也前日 殿下示臣等曰古今蒙宥非獨瑜也臣等以為舜不殺象周公誅管蔡今瑜罪浮管蔡非象之比 殿下當以處管蔡處瑜不當以處象處瑜也漢文帝不殺淮南王遼太祖不殺刺葛安端然淮南王外諸侯驕橫不戢非如瑜兇謀詭計圖危 宗社之甚也刺葛安端性本庸愚為凶徒所脅非如瑜慄悍譎詐首惡唱亂之比也况漢文中才之主遼太祖夷狄之君以 殿下之明睿果斷其為行事不法周公及効漢文遼主之為乎此尤臣等之所惑也臣等又考前史以私恩小惠不能誅罪養患遺後噬臍無及者多矣此又可法乎言之至此尤切痛心伏望 殿下剛斷勿疑置瑜於法為宗社大計 御札荅曰方在思度之時未可輕議○禮曹啓儲位不可不早建請辨封拜諸事 從之○設法席于內佛堂○丙午宗親及議政府忠勲府六曹啓魯山君得罪 宗社近日亂言者皆以魯山君為言古有詐稱太子扶蘇者亦有衛太子之事今若不畧於法則欲圖富貴者藉以構亂不可宥也瑜天

下大逆不可以私恩曲宥之也臨瀛大君璆就鄭昌孫與言
曰玳瑁宋瑄壽與瑜罪同不可獨生請須并啓昌孫顧左右曰
玳瑁事吾等初雖不及擬議然可并啓也遂即請罪 御札答
曰敬知羣臣之意所不聽者非予自為盛德也薄德無德之至
何敢復為傷殘骨肉之事乎有罪者尚且保之何至於玳瑁無
罪之輩乎此則羣臣之計非也其速退而待予竟度昌孫等更
啓曰臣等固知 聖上不忍之心然所謂傷殘骨肉非此之謂
也古語有之不以私恩廢公議請斷以大義 傳曰前書已盡
無復有更言也卿等急速退去昌孫等更啓為天下國家賞罰
為大不可以此而示諸人大逆不道非罪疑更何商度請速
斷之 傳曰方在商度不可輕議○丁未 御慶會樓東偏房
引見承旨曹錫文尹子雲金礪議事 上曰苑囿非人君遊樂
之所也供祭祀講武事而已今講武場延袤廣遠無益於國而
禽獸又從而害苗其遣官審度地宜定其界限自餘一皆罷之
聽民耕獵後世之君喜田則益之其不喜者自罷之子非不知

田獵之為樂也然豈不恤民予計若此而已又曰前已諭黃海道觀使察自他道往居者平安咸吉江原三道入外勿還本土其今戶曹移文下三道京畿苟欲移居黃海道者勿禁又曰文宗命予撰兵要刑煩就約便於觀覽精華悉具但簡秩猥多不學武臣難於遍閱故予欲極約之使武臣輩常熟讀如唐太宗隋煬帝親征不克等事使人聞之如昨日事庶有益乎時禮曹判書洪允成起復為知中樞院事令允成約之○傳旨刑曹曰在前流移人物不知國法苦於此而安於彼欲養育其妻子官從而拘勒之妻子死病而不救因而失業散為盜賊之甚愍焉其已流移之民皆勿還本令所在安業自來年三月一日以後流移者依前還本若他道之民欲往居江原黃海道者余平安咸吉道人外雖限後勿還本厚給土田給復五年又近日龍仁之地盜賊成羣殺害人畜而官及隣里無告之者今後有保納無根人者及小害者并隣里治罪○日本國對馬島主宗成職遣使來獻土物○傳旨兵曹曰八道量諺巨觀各統是干所

郡使都節制使統其鎮將○戊申 御思政殿受常參視事讓

寧大君禔孝寧大君補壁席更請魯山君及瑜等罪 上曰今

日且飲酒 此事非所論也○夜初鼓 御慶會東偏房

引見左副承旨金碩議事仍召左贊成申叔舟兵曹參判具致

寬議請道設鎮便否及戶籍之法○己酉讓寧大君禔等啓曰

前日請魯山君及瑜等罪至今未蒙俞允請速置法 上不

允禔再啓如大逆事關 宗社非所商量請斷以大義又 不

允臺諫啓前日請瑜等罪未知上裁 傳曰今將出外還更思

之 駕幸蜂峴更相前日所定山乃艮山也參判李紘之啓此

山生艮丑非艮山故有是行○傳旨兵曹令丁丑十月以前諸

牧場倒換馬勿徵○庚戌讓寧大君禔等啓曰前請瑜與魯山

君瓊玟瓊鄭棕宋玆壽等事請速斷之 傳曰近日事務繁多

未暇商量更啓如此大事非所商量 傳曰李甫欽不死罪同

罰果可乎又啓甫欽亦不可赦 傳曰所言是矣當與大臣詳

議鄭昌孫申叔舟黃守身朴仲孫啓前日所啓瑜與魯山君事

至今未蒙 上裁臣等終夜不寐敢冒 宸聰傳曰甫欽不死
豈可同罪異罰更啓曰甫欽之罪亦當如法然與瑜小異請先
斷渠魁 傳曰如此大事大臣不齊而斷之可乎當與領議政
共議○兵曹啓今奉 傳旨革諸道中左右翼量置巨鎮所屬
諸邑磨勘具聞平安道平壤鎮屬中和祥原順安三登成川陽
德慈山龍岡鎮三和咸從甑山江西安州鎮永柔肅川順川定
州鎮隨川嘉山龜城鎮宣川郭山泰川雲山義州鎮鐵山龍川
朔州鎮昌城碧潼寧邊鎮博川价川德川殷山孟山熙川江界
鎮理山渭原慈城咸古道安邊鎮德川文川永興鎮龍津高原
預原咸興鎮定平洪原北青吉州鎮利城端川鏡城鎮富寧獨
鎮甲山會寧鍾城慶源慶興穩城慶尚道安東鎮豐基榮川奉
化義城禮安真寶青松軍威比安慶州鎮寧海盈德清河興海
迎日長鬻永川密陽蔚山鎮機張東萊梁山彥陽昌原鎮金海
固城熊川漆原咸安鎮海巨濟大丘鎮靈山昌寧玄風仁同義
興新寧河陽慶山清道晉州鎮泗川昆陽河東南海丹城山陰

宜寧咸陽三嘉安陰星州鎮草溪陝川居昌高靈知禮尚州鎮
善山開寧金山咸昌龍宮聞慶醴泉全羅道羅州鎮茂長高敞
靈光咸平務安靈巖南平長興鎮寶城康津海南珍島光州鎮
潭陽長城珍原昌平和順同福綾城南原鎮任實長水淳昌雲
峯玉果谷城求禮扶安鎮臨陂沃溝萬頃金堤古阜井邑興德
順天鎮樂安興陽步陽全州鎮礪山龍安咸悅益山高山錦山
茂朱龍潭鎮安金溝泰仁忠清道公州鎮燕岐懷德鎮岑連山
息津尼山石城林川韓山扶餘定山洪州鎮舒川庇仁藍浦鴻
山保寧青陽大興德山結城泰安鎮瑞山海美唐津沔川天安
鎮稷山平澤牙山溫陽新昌禮山木川全義清州鎮鎮川文義
懷仁報恩青山黃澗永同沃川清安忠州鎮永春堤川丹陽清
風陰城槐山延豐京畿水原鎮富平仁川衿川安山南陽振威
安城陽城廣州鎮楊根砥平川寧驪興陰竹竹山利川陽智龍
仁楊州鎮漣川麻田積城原平交河高陽水平抱川加平江華
鎮金浦陽川通津喬桐開城鎮朔寧臨津豐德黃海道海州鎮

工套白川延安康翎瓮津長淵豐川松禾殷栗黃州鎮瑞興平
山鳳山載寧信川安岳文化長連遂安鎮谷山兔山新溪牛峯
江原道江陵鎮襄陽旌善三陟鎮蔚珍平海杆城鎮高城通川
歙谷淮陽鎮金城平康伊川鐵原金化安峽春川鎮狼川楊口
麟蹄洪川原州鎮平昌寧越楮城 從之 ○辛亥 御勤政門
受朝叅鼓吹陳叨不作臺諫啓請瑜與魯山瓔玳瑁宋玆壽等
罪 傳曰罪不可不分揀宗親及議政府忠勲府六曹亦以此
啓請 傳曰誰為魁首再啓以前年之變觀之魯山為首在今
日瑜為首然大逆不分首從國人所不得而誅之請速置法 上御
慶會樓下引見領議政鄭麟趾左議政鄭昌孫右議政姜孟卿
左贊成申叔舟右贊成黃守身右叅贊朴仲孫禮曹判書李承
孫兵曹判書洪達孫工曹判書沈會刑曹判書朴元亨都承旨
曹錫文觀射司僕內禁衛等分三隊射侯知中樞院事洪允成
發無不中 賜內廐馬 ○讓寧大君禔等上疏曰臣等聞猶
豫不斷則必有後患以私滅義則害於大計前日姦兇之變魯

山預焉得罪 宗社瑜交結黨援謀為不軌臣民共怒而 殿
下尚顧私恩不忍置法遷之於外曲全性命猶不知再造之德
舉兵而反行欲挾魯山以危 宗社罪惡貫盈天地不容豈宜復
貫以紊邦憲臣等累請正法未蒙 允許不勝憤鬱 瓔玳瑤
鄭棕宋玠壽等兇逆之罪王法必誅而不赦者也伏望斷以大
義明正典刑以絕禍根以定人心領議政鄭麟趾等上疏曰竊
念恩輕而義重大義滅親魯山前日之變罪關 宗社口不可
言瑜包藏禍以謀為不軌死有餘辜 殿下以不忍之心置之
於外恩賜稠重尚不念 聖恩舉兵而反謀挾魯山罪不容於
天地之間而 殿下欲以私恩曲貸其死臣等庭請累日未蒙
俞允大小臣僚憤鬱未伸且瓔玳瑤鄭棕宋玠壽等黨逆之
罪不可赦伏望 殿下斷以大義明正典刑以副臣民之望
上命瑜賜死瓔玳瑤宋玠壽勿論麟趾等更啓曰瓔玳瑤
棕玠壽罪同亦宜置法 上曰不可古人有言殲厥渠魁脅從
罔治且聖人不為己甚今若並置於法則已甚 命玠壽處絞

餘並勿論復請禁防璽等 允之魯山聞之亦自縊而卒以禮

葬之○壬子 傳旨兵曹曰講武場除供祭禽外許民耕墾○

輪對訓鍊觀使梁誠之啓今成均四部學堂儒生各以行幸

所過侍立啓傍古來四部學堂及成均館教官每朔望大朝會

外勿令隨班專為教訓今使童蒙侍立廢學請罷之 上曰予

於往日過東部見儒生橫行無禮故立此法蓋欲懲戒耳遂命

罷之注薄朴宗文極口讚 上德因陳當代佛事之非 上以

面諛命亟出引唐太宗宇文士及之事大笑○御慶會樓下觀

射宗親及領議政鄭麟趾左議政鄭昌孫右議政姜孟卿左贊

成申叔舟右贊成黃守身坡平君尹巖鈴川君尹師路左參贊

朴仲孫右參贊成奉祖知中樞院事楊汀洪允成兵曹判書洪

達孫京畿觀察使辛碩祖承旨等及訓鍊觀使梁誠之侍食誠

之進便宜四條一臣聞自古人主設官分職以代天工興禮樂

導民為善制刑罰禁民為惡然所先務不過足食足兵二者而已

足食則養民之生足兵則除民之害不可不為也近年以來

禾穀不登加以屢蠲逋欠義倉不實軍資亦耗補添之策不可
不慮然皆以諸司徵贖之物外方魚鹽所易可以充數俱不可
也莫如大行屯田之法州郡閑曠如黃海咸吉道流徙如江原
平安道可耕之地甚多又京畿下三道豪俠之家廣占良田或
互相陳荒或代人佃作如此田地隨宜請借官給糧種民出牛
具千戶之州耕五十石百戶之縣耕五石一日耕之一日播種
三日除草一日收穫一日打取如是五年而止則借民力一年
不過七日而為民生無窮之利豈不樂赴於事哉况以佚道使
之雖勞何恤哉其守令及監考勸農特加勸懲又出民田戶或
除雜侵或授散官且宋之青苗即本國長利之法宋人欲常行
於天下則不可初暫試於陝西則有益焉乞自明年義倉賑貸
依私家長利例收息亦限五年而止一汰冗官所以汰冗食也
然今檢校奉朝請之臣或有氣力未盡衰者古人云人惟求舊
乞今後不甚衰耗猶足治事者優待之官降授外任若勤謹職
事則復除京官或年齒已暮不堪吏治自恃官高不親民政則

求棄不用如是則國家待老臣終始有道矣宋朝罷相例食祠
祿亦此意也茲法之行朝中士夫桑榆稍晚則咸有失職之虞
恐乖大平盛事也寧減羣臣祿科寧授其人行職勿遽棄老德
姑試外寄使得食祿一戶罰士卒貴於精鍊侍衛不可單弱本
朝銃筒衛步兵中最號精強今遽罷遣臣竊惑焉乞仍舊制改
衛稱軍使七品去官給月俸六斗如是則不至於驕惰難制而
步兵無不精矣若曰既以革之不可復立則令該曹取所願分
屬京外騎步兵苟使數千精兵付籍與否任其所為則何以責
守令之漏丁乎又臣前日在大將幕下見入直甲士不過七八
十人關內把門猶且不足甚為虛疎乞自今甲士每番上須定
一千人每八番不下二百人如以祿科為難則三朔遞番略給
月俸一兵可千日不用不可一日不鍊往者攝六十日就訓練
觀習杖其時有一人壯健而不習杖一人矮弱而習杖二人相
關不習者救以此觀之習杖之有益也明甚且防牌列居陣之
外面者也往時亦於訓練觀習之今專不習臣意以為初不試

弓矢擊刺之法而補軍額後又以昇平無事而不習萬一猝至
有變而後蒼黃鍊閱豈不誤事自今上項人等令依舊鍊習大
抵臣子之盡言為難而君上之聽言為甚難聽言固難而用其
言為尤難伏望 聖慈恕臣狂僭特垂睿覽且臣當 殿下即
位之初首疏君道之要其冬差往平安道審定地圖回還進備
禦事宜前年春又陳便宜二十四事皆蒙優納悉令大臣擬議
但至今未知區處夙夜顛望伏乞更留 聖慮不勝至願 上
覽之曰言有中不中爾留心民事知無不言予甚嘉賞又曰誠
之非常人也 命宰樞分左右投壺較勝負賭幣 賜麟趾盃
卿叔舟碩祖允成錫文摯軾鹿皮各一張 上謂麟趾等曰漢
高祖不能保全功臣前年殺韓信今年殺彭越此其失處也昌
孫起啓此真大失也麟趾曰漢高祖能納言善用人此漢業所
以興也上曰然古不云乎好問則裕自用則小能自得師者王
謂人莫己若者亡君道之體不過此語 上親習陣於後苑以
兼司僕內禁衛為左右隊宰樞承旨乘司僕馬侍衛 上駐

馬進酒○刑曹啓本宮奴禿同典農寺奴尹生等將西瓜胡桃
要謁魯山君罪應凌遲處死籍沒緣坐如律 命只杖一百○
日本國肥前州碧海源正浚遣使來獻土物○癸丑上閱武於
後苑分禁軍為左右兩命將節制仍 御慶會樓東墻門外觀
射宗親宰樞承旨等侍○義禁府啓學生沈希括言今年農事
不遂無他 主上即位所致且震大門甲士死雖一日復立上
王則天變當何如係是干上之言罪應斬籍沒家產學生李升
萬誣告希括擬於七月二十日前犯闕將議親權家沈家洪家
署名之書來示就奪其書還被希括所奪且於希括和論明文
內追書國王凡上軍人都目給還十字欲陷希括罪應凌遲處
死籍沒緣坐如律 命希括處斬除籍沒升萬只杖一百○知
敦寧府事金漸卒謚胡剛彌年壽考胡追補前過剛○甲寅諭
諸道節制使曰國之大事軍政而已軍政之要在節制教閱整
械器固城郭而已故今置巨鎮於諸要害處各統若干州郡其
鎮將又統於都節制使卿身受子方略司一方生靈之命其委

任豈不重且大哉卿宜體予益勵心力期顯成績思永流芳所
宜節目條于後一節制教閱者每正月十一月集所至之鎮統
管州兵擇州官及麾下而授形名或作三衛或作二部或作隊或
作旅若進退行留戰陣之勢若習射講法等事量宜閱習其餘
諸鎮行移集兵使各閱習子將遣人觀卿之才一整器械者弓
箭甲冑兵器之最造不堅實徒為虛費雖有良才及如奴手卿
之敵愾將安所施自今急急留心於造弓箭子所常用鄉角弓
甚好不必唐角弓今送弓箭甲冑可做製造子將遣人考諸邑
兵器一固城郭者非厲民也保吾民也聚會遠邑之民刻日役
之以甚憚之勞為護他之役其肯用心堅築乎是則厲民而已
今則不然使各修築邑城不以日月役不甚勞喻之利害則必
有益矣然役民大事也須取旨乃舉並宜知悉子將遣人審其
功效右三節目舉其大者耳遺其小節待卿自思○傳旨造墓
都監曰世子墓石室及石床長明燈雜像並依例其莎臺石及
三面石闌干三階砌則勿設○徭慶會樓東偏房引見都承

曹錫文史官隨之錫文曰我等獨入時史官不可擅入也止之錫文之入也鈐川府院君尹師路謂錫文曰瑜之妻為孟漢輩原之妾則例給功臣宋珖壽妻為魯山妻原之其他女子亦當給付功臣須以此建白事若成則願受珖壽之女師路尚貞顯翁主有寵於上氣度么麼頗警悟善殖貨利外方農莊所在累鉅萬石京第積儲之庫宏壯數里可望凡所誅求類此○乙卯命都承旨曹錫文同副承旨鄭軾往王世子墓所檢審諸事○丙辰御札諭咸吉道觀察使咸禹治都節制使郭連城曰松鶻至今未捉卿等豈不用心蓋未得其要故耳大抵守直器械人等摘姦過去後必不守直卿等莫之思予甚非焉其令守令無時摘奸勿致闕直○咸吉道鍾城鎮捕松鶻一連差人馳啓命賜來人衣靴○傳旨吏兵曹還給前司譯院直長高霑告身○兵曹啓前此外方人上京從仕者必受中翼陳省令既革罷置巨鎮若受主鎮陳省則隔遠程途來往有弊請令所在邑直給陳省且諸邑守令利其任使不給陳省遂使終身沉

滯至為不可後有如此者請治其罪 從之○義禁府啓學
生朴守明發亂言罪應斬籍沒家產 從之○丁巳 御思政

殿受常參視事宗親及議政府左贊成申叔舟判中樞院事權

學左參贊朴仲孫吏曹判書韓明澮兵曹判書洪達孫工曹判

書沈澮漢城府尹金何都鎮撫朴炯兵曹參判具致寬承旨等

及吏曹參議李克堪侍食觀捧戲 命文臣宰樞賦詩克堪詩

曰人言創業艱臣謂守成難願言保終始邊庭羽檄閑各廢進

又 御慶會樓東墻門外觀射宗親及諸宰樞分韃射侯較勝否

勝者各 賜蘇木五十斤○以洪益生梁誠之尹吉生僉知中

樞院事○遣義禁府都事崔季男子博川絞李甫欽○戊午禮

曹啓葬世子時宗親全數議政府六曹堂上臺諫諸司各一員

送至墓所 從之○日本國豐州太守太友親繁肥前州上松

浦呼子源高對馬州宗貞國宗盛直各遣使來獻土物○己未

諭諸道察訪曰往者胥吏無識之徒分守驛路不顧大體營

私萬端侵擾吏民驛路凋殘予欲更張革弊擇爾等分掌諸

驛爾等所啓事目皆已許可今既就職日多驛吏利害富實條件想必已悉勿謂煩聽更加詳悉以聞予將採擇爾等既知予心各勵心力○庚申讓寧大君禔孝寧大君補率宗親來啓曰瑜既抵法璵玳瓊鄭棕獨保首領臣等以為不可傳曰予嘗思之勿復言

世祖惠莊大王實錄卷第九

不...

...

...

世祖惠莊大王實錄卷第十

十一月辛酉朔 御慶會樓下觀司僕內禁衛別侍衛甲士等

射侯又 御後苑觀射宗親及李澄石申叔舟權擊洪達孫楊

汀曹錫文韓繼美權擊金礮鄭軾權權等侍張二侯竟日射之

御製詩曰欲小欲可滿事簡事可成敬天天可保勤民民乃寧

小藝莫致慮大政宜致精學和之曰木從繩則正玉非琢不成

禦乎朽索馭本固邦其寧宵旰更憂勤愚臣當竭精賜澄石弓

一張虎皮一張時 上即位未久務達下情數憑觀射延訪股

肱之臣○壬戌百官行 千秋賀禮○讓寧大君禔等啓瓔玕瓊

鄭宗請速置法 傳曰勿復言再啓 不允○親講儒生宗親

及右議政姜孟卿左贊成申叔舟判中樞院事奉朝請李澄石

吏曹判書韓明澮兵曹判書洪達孫知中樞院事洪允成楊汀

兼成均司成金鈞金末金新民承旨注書史官等侍○甲子輪

對義盈庫使元孟穰啓今諸邑監考憑公營私漁奪窮民所欲

不遂則陷以他事繫縛歐傷臣願擇廉簡者一人付之一面兼治

諸事則民瘼祛矣副使周新命啓國家於諸渡置官船以濟人
然官船高私船低便於升降以故行人爭赴私船以求速渡舟
人坐索高價而後涉之否則亦必中流劫掠甚非所以設官護
涉之意也臣請改作官船以便渡涉上皆納之○諭全羅道都
節制使曰聞道內光州周末同等五十餘人獷悍成黨殺害人
物為鄉里患久矣今又焚燒別侍衛竒有文妻家劫奪頭畜財
產恣行不忌所在守令懵然莫聞甚為不當卿可率營軍出其
不意無遺掩捕交付觀察使如未盡捕則必逞憤於寡婦卿知
此意曲盡布置○傳旨戶曹曰江原黃海道膏腴可耕之地頗
多荒廢明年為始新墾田者限五年勿收粗○乙丑諭諸道觀
察使曰農桑畜牧民生之大事也而勤則有利怠則非但無效
死亡流離之源也監司守令非不體予用心而無知之民安於
目前之佚莫肯遠計而預致力焉日貧日窮人人皆然農桑畜
牧堤堰等事有一事能者是人必千萬人之傑者予所欲得用
者卿具錄姓名及功績事狀以啓予必擢用焉○丁卯 御後苑

觀射餞奏聞使韓明澮具致寬左議政姜孟卿左贊成申叔舟
兵曹判書洪達孫知中樞院事楊汀洪允成承旨等入侍○傳旨
刑曹曰海陽大君齊宗諱行冠禮自十一月初七日以前奸盜外流
以下罪並皆原免○戊辰 命注書梁順石內醫金尚珍齋酒
藥往世子墓所救役夫寒凍者○禮曹啓 王世子靈柩發引
日書筵官翊衛司表服國葬都監造墓都監殯宮都監提調及
郎官白衣烏紗帽烏角帶布帶送至墓所書筵官翊衛司則仍
留墓所返虞時用吉服陪還 從之○己巳 御後苑觀射宗
親及左贊成申叔舟判中樞院事權擘兵曹判書洪達孫知中
樞院事楊汀洪允成承旨等及僉知中樞院事魚得海侍射
賜允成白鐵罐○庚午遣吏曹判書韓明澮禮曹參判具致寬
如大明請封世子兼獻海青兔鶻奏本曰臣世子暉於天順元年
九月初二日患病身故第二子暉係暉母弟見年九歲國人請
為世子臣未敢擅便為此謹具奏聞御前禮物黃細苧布二十
匹白細苧布二十匹黑細麻布五十匹龍文簾席四張黃花席

一十張滿花席一十張滿花方席一十張雜彩花席一十張石
燈盞四事雜色馬一十五匹皇太子禮物白細苧布二十匹黑
細麻布二十匹滿花席一十張雜彩花席一十張雜色馬四匹
命曹錫文尹子雲韓繼美往華慕館餞明澮等 上引明澮從
事官任元濬謂曰藝文館所無書籍醫方佛書可多購來明澮
致寬之將行也 上賜鞍馬弓矢貂裘貂冠凡隨身衣仗無一
不備分 御膳珍羞持付別司饗一人隨行 命上護軍趙得
琳慰宴於平壤安州義州餞于娑娑鋪而還明澮等既上道
上曰祈寒遠道風雪砭骨尤易侵衣領間命用貂皮作回項馳
驛以賜後李澄珪以進鷹使行 命授細麻布五匹就賜明澮
等為酒饌費且曰甚苦遠行可一權飲明澮等受 賜貫酒饌
會諸從官飲未即席先行四拜澄珪舉酒立賜明澮以下俯伏受
之館人及自外至者皆望見異之以問譯者曰拜而坐伏而飲
是何禮也譯者曰拜君賜也因道其所以傍有一儒生曰果若
人言禮義之邦也嘖嘖稱歎○諭咸吉道都節制使郭連城曰

近聞兀狄哈等聚兵謀復讎於斡朶里斡朶里等亦聚兵應之
此是自中相圖然此輩散處故力弱不敢侵邊今若並之則將
為邊患其勢不可不審當以計和解之兀狄哈至近境則我當
為之聲援以庇近境之人然不可輕舉代人受兵卿審處之又
為大將之道貴持重萬一輕而致悔大虧國體卿既知將道宜
體予撫士卒布寬澤乃可得衆心○辛未 御慶會樓下 觀
射○癸酉諭平安道都節制使柳河曰塞上寒苦念卿守禦之
勞特 賜裘一領○吏曹啓西班牙受職人內忠義內禁別侍忠
順忠贊衛則帶甲護軍則佩弓箭侍衛職兼東班者並隨東班
行職堂上則無衙會之所因此隨班者少請自今職兼東班者
並從實職隨班行職堂上官許於敦寧府直房衙會 從之○
甲戌 傳旨義禁府曰行大護軍趙邦霖行軍器監正金乙孫
監督造募役夫二人死推鞫以啓○乙亥禮曹啓 王世子與
賓客相會儀其日內侍設 王世子座於正廳東壁西向賓客
位於西壁東向皆用文侍王世子出就座前立賓客入就位前相向再

拜訖俱坐內侍置書案及書冊於王世子座前及賓客前
王世子受讀訖司饗房設酒饌行揖禮而出從之○賜世子
謚懿敬溫和聖善懿夙夜警戒敬其冊曰天性所鍾恩情無間
於存歿國典斯舉終始有備於哀榮惟爾諱岐嶷英資溫文德
器問安侍膳孝盡怡愉之權重傳尊師學有緝熙之益監撫之
重允屬謳歌之望攸歸謂爾有宜君之資謂爾為善繼之嗣庶
衍龜筮丕承燕謀何我家不吊於靈旻而乃身遽戾於殤天流
光徂而勞心益怛佳城卜而哀涕無窮載惟父子之間曷任幽
明之恨誕敷異數少慰英魂乃遣臣議政府右贊成黃守身捧
冊贈謚曰懿敬於戲弱冠捐膝下之息少陽鎖宮中之闥得其
名不得其壽痛精靈之安歸傳諸子而傳諸孫昭顯號於可久
爾惟不昧當克欽承其儀曰前期擇吉告宗廟用牲幣行禮
如常儀賜謚冊謚印前一日工曹叅判捧謚冊謚印入內其日
典儀設賜冊印官贊成有故則位於殿庭道東北向讀冊官讀
印官捧冊官捧印官舉冊案者舉印案者位於其後東上典儀

通贊奉禮郎位如常奉禮郎設賜冊印官以下位於勤政門外
道東西向異位重行北上禮曹正郎陳謚冊謚印綵輦於勤政
門外兵曹正郎陳細仗於綵輦之南時至賜冊印官以下具
時服皆就門外位傳教官皆承及內直四人詣思政殿閣外以候
奉禮郎引賜冊印官以下由東偏門入就位內侍捧謚冊謚印出
閣外內侍舉冊印案從之內侍以謚冊謚印授傳教官傳教官
進跪受內直傳捧冊印案每案二人對舉進傳教官前傳教官以冊印
置於案俯伏興由勤政殿東邊降自東階詣賜冊印官東北西
向立內直各舉案從之立於傳教官之南少選西向傳教官稱
有教通贊唱跪賜冊印官以下跪傳教官宣教曰賜予世子謚
冊謚印命卿展禮宣訖典儀曰四拜通贊唱俯伏興四拜興平
身賜冊印官以下俯伏興四拜興平身內直以謚冊案進傳教
官前傳教官取謚冊函內直以案授授賜冊印官賜冊印官進
北向跪受舉冊案者二人對舉冊案進賜冊印官之左置謚冊
函於案舉冊案者對舉退立於賜冊印官後傳教官取謚印盃

授賜冊印官如授謚冊函之儀訖賜冊印官俯伏與平身奉禮
引賜冊印官由東門出舉冊印案者前行賜冊印官以謚
冊謚印置于綵輦細仗前導如式賜冊印官以下出光化門外
乘馬而行賜謚冊謚印儀前一日忠扈衛設權置冊印幄次
於殯宮門外設賜冊印官次於冊印幄次之南隨地之宜其日
典儀設賜冊印官位於殯宮戶外之東西向讀冊官讀印官捧
冊官捧印官舉冊印案者在南差退西向設典儀位於賜冊印
官位東北西向通贊奉禮郎位如常設權置冊印案二於殯宮
閣外近限冊案在北
印案在南又設權置冊印位於殯宮階下北向設席
於冊印官至殯宮大門外以謚冊謚印權置於幄次奉禮郎引
賜冊印官就次小頃內侍設香爐香台并燭於靈座前設尊
於戶外之左置盞三於尊所攸司進禮饌奉禮郎引賜冊印官以
下入就位時捧冊印
者先入引詣香案前立稱有旨使某賜謚冊謚印
傳訖捧冊官以冊函跪授賜冊印官賜冊印官受立授捧冊官
捧冊官受跪置於案開函展冊讀冊官讀冊訖退賜印讀印

如上儀訖退賜冊印官府伏興執事者以盞酌酒跪授賜冊印官

賜冊印官執盞立授執事者執事者受盞跪奠于靈座前三連奠

訖賜冊印官府伏興奉禮郎引出冊印案於殯宮發引日以腰

鞶奉行平時印內侍捧出以授尚衣院官負○廣興倉副使金

賤夜開庫門取雜塵米穀潛移他所倉丞鄭倣告之下司憲府

鞠之○丁丑 御後苑觀射宗親及領議政鄭麟趾左議政姜

孟卿左贊成申叔舟兵曹判書洪達孫知中樞院事楊汀洪允

成當直都鎮燕衛將承旨等侍計吏曹參判金淳兼成均司成

金鈞金末金新民等率儒生而入 上親講之又講習讀官醫

書○戊寅海陽大君睿宗諱始讀孝經吏曹參議李克堪藝文直

提學韓繼禧進讀 命饋酒賜表裏各一套○義禁府啓安置

瓔珞瓊鄭棕禁防條件一欄牆外設鹿角城一外門常時鎖

鑰朝夕之需十日一次給之又於牆內掘井取給使外人不得

相通一外人往來交通或贈遺者以黨不忠論一守令不時點

檢守門者如有非違依律科罪 從之○吏曹據宗親府書題

崔梁海等上言啓諸司吏典多年勤苦從事呈都目後累年不得受職而死者或有之請自今有欲檢職去官者許於本職陞授一等且一年吏典去官七品三十二八品四十七九品三十三除願授檢職者及東班職取才入格者外所餘不多令兵曹一年內畢授職其曾呈都目而欲授檢職去官者亦聽從之○宗簿寺啓魯山及瑜瓔玳瑁鄭棕等罪關宗社屬籍當絕請并子孫削宗親錄類附錄從之○禮曹啓今世子魂宮上食致祭時宗親及功臣子孫依文昭殿例每一日一人輪次直宿奠爵宗親則典籤司功臣子孫則忠勳府先期知會勿致違誤從之○吏曹據中樞院單字啓中樞院舊稱三軍府屬於兵曹郎官褒貶時堂上就兵曹同議施行今既為一品衙門請依駙馬忠勳府例只令本院堂上褒貶從之○義禁府啓私奴石乙山亂言罪應斬籍沒家產從之命勿籍沒○禮曹啓世子神主外面題懿敬世子神主無旁題奉祀陷中題有明朝鮮國王世子諱神主從之○設世子啓殯奠其儀曰前期三日告社稷宗廟如

常告儀無與其日設主喪位於殯宮戶外之東西向設書筵官
翊衛司位於其後設諸執事位如常儀前一刻攸司進禮饌設
於靈座前設香爐香合并燭於其前奠祝文於靈座之左設尊
於戶外之左置盞三於尊所前一刻謁者引主喪及書筵官翊
衛司入就位贊者唱哭主喪以下俯伏哭贊者唱哭止再拜興
平身主喪以下哭止再拜興平身謁者引主喪升自東階詣香
案前北向跪贊者唱跪書筵官翊衛司皆跪三上香酌酒奠于
靈座前連盞三盞俯伏興小退跪大祝進靈座之左西向跪讀祝文
訖謁者引主喪退復位贊者唱哭主喪以下俯伏哭盡哀贊者
唱哭止興再拜興平身主喪以下哭止興再拜興平身內侍捧
祝文焚於爐置銅爐於露臺之西遷座及奠於殿內西南贊成升自東偏
階執事者一人捧拂梓室之中有從升贊成詣梓室南北向俯
伏跪告曰贊成某謹以吉辰啓攢塗告訖俯伏興繕工監帥其
屬升撤攢塗畢贊成以巾拂拭梓室覆以棺衣降出書筵翊衛司同內
侍撤饌設幄及靈座靈寢並如初攸司進禮饌設於靈座前如

常儀謁者引主喪及書筵官翊衛司入就位贊者唱俯伏哭主
喪以下俯伏哭贊者唱哭止主喪以下皆哭止謁者引主喪詣
香案前跪贊者唱跪書筵官翊衛司皆跪上香奠酒如上儀訖
謁者引主喪降復位贊者唱俯伏哭主喪以下俯伏哭贊者唱
止哭興再拜興平身主喪以下哭止興再拜興平身謁者引主
喪以下出自後至數引代哭不絕聲啓攢官贊謁者一贊者一
大祝一齋郎一祝史一執巾者一並祭○設祖奠其儀曰其日
設主喪以下位如常儀前二刻攸司進禮饌設於靈座前設香
爐香合並燭於其前奠祝文於靈座之左設尊於戶外之左置
盞三於尊所前一刻謁者引主喪書筵官翊衛司入就位贊者
唱俯伏哭主喪以下俯伏哭贊者唱哭止興再拜興平身主喪
以下哭止興再拜興平身謁者引主喪升自東階詣香案前北
向跪贊者唱跪書筵官翊衛司皆跪三上香酌酒奠于靈座前
連奠三盞俯伏興小退跪大祝進靈座之左西向跪讀祝文訖謁者
引主喪降復位贊者唱俯伏哭主喪以下俯伏哭贊者唱哭止

興再拜興平身主喪以下哭止興再拜興平身謂者引主喪以

下出內侍捧祝文焚於爐謂者一贊者一祝史一齋郎一大祝一

○設遣奠其儀曰前一日國葬都監進轎及魂帛腰舉冊印腰

舉香亭等於中門外當中南向轎在北進魂帛轎子及舉於外

門外當中南向轎在南陳吉仗於魂帛轎子前凶仗及明器於大

舉前其日設主喪及書巡官弔衛司位如常儀讀哀冊官舉

案者謁者贊者位於外庭並如常儀禮曹正郎權置哀冊於西

階下北向設席有案設引前五刻攸司進禮饌設於靈座前設香爐

香合并燭於其前奠祝文於靈座之左設尊於戶外之左置盞

三於尊所前四刻謂者贊者先入就位謂者引主喪以下入就

位贊者唱跪俯伏哭主喪以下跪俯伏哭贊者唱哭止興再拜

興平身主喪以下哭止興再拜興平身謂者引主喪升自東偏

階詣香案前北向跪贊者唱跪書巡官弔衛司皆跪三上香酌

酒奠于靈座前連奠三盞俯伏興少退跪大祝進靈座之左西向跪

讀祝文訖俯伏興退謂者引捧冊官謂者正於門外後詣哀冊案前

西向跪捧冊函興由中階升舉案者從之詣香案前跪先置案
次置冊函俯伏興少退北向跪謁者引讀冊官由東偏階升詣
冊案前北向跪贊者唱跪捧冊官進跪開函展冊讀冊官讀冊
訖俯伏興捧冊官以冊還置於函捧冊官興舉案者置案於靈座
前稍東俯伏興捧冊官跪置冊函於案俯伏興具降復位贊者
唱俯伏哭主喪以下俯伏哭盡哀贊者唱哭止興再拜興平身
主喪以下哭止興再拜興平身內侍撤饌內侍捧祝文焚於爐
謁者引主喪以下出外門外東序立以俟大祝文臣讀哀冊官
文臣捧哀冊官文臣舉案者二外執事六外謁者贊者各一哀
冊曰維天順元年歲次丁丑九月壬戌朔初一日癸亥王世子
率越三月甲申葬于高陽蜂峴之原禮也龍攢徹帟蜃輅結駮
翟茀婀娜羽衛森嚴 主上殿下哀繼明之不耀悼主器之無
祿瞻東朝其慘悽臨甲觀而悲惻載命詞臣式揚休烈爰撰德
於琬琰永傳輝於簡策其詞曰乾龍在天震索儲祥仰惟前星
曰位小陽姿相歧嶷德器允良溫文端重英睿聰明大孝生知

至仁成性兩宮鍾愛貳極居尊詩禮早聞膳寢是勤承順無違
夙夜惟謹惟聖天縱惟學時敏尊師重傳親賢遠佞左右惟人
輔養以正承桃主宅撫軍監國叅贊聖謨翊亮大業惕惕承軌
明明繼離天子曰命衮服是宜羽翼既成磐石愈堅方嗣體而
守國忽厭世而昇仙嗚呼哀哉夏謳之啓堯顙類辛漢儲之建
己早周嗣之孝乃純藹民庶之懽心忤吾君之有子嗟九齡之
不與遽三朝之未至嗚呼哀哉龍顏永違鶴駕長徃乾維傾兮
星躔掩耀坤軸缺兮少海翻浪嗟震雷之奄鷲悼七鬯之已喪
春宮閒兮鎖門講筵寂兮虛幌嗚呼哀哉金枝早墮玉裕永闕
仁何為兮不壽德何為兮不位究理數之參差仰真宰其茫昧
嗚呼哀哉龜謀協貞龍崗卜吉玄宮啓扉縞衣載紼儼仙帳兮
雲移殷簫鼓兮泉咽風纏纏兮欲曉月淡淡兮將夕嗚乎哀哉
悲大夢之若此竟厚夜之不晨緬音容之何在跼穹壤而無垠
叫帝閭兮莫聞隱予心兮誰激嗚呼哀哉吉凶匪人修短關天
哀榮極備終始以全顧令德令儀之可尚而重輝重潤之難名

配穹蒼以不朽溢汗青而有聲嗚呼哀哉○夜二鼓遣宣傳官
 召左贊成申叔舟兵曹判書洪達孫知中樞院事楊汀洪允成
 命叔舟為左廂大將領闕內宿衛軍士汀為右廂大將結陣
 于殯所達孫允成直都鎮撫所三鼓世子柩發引嬪及三昭訓
 以素輿從忠勳府議政六曹忠翊司各設路祭 命都承旨曹
 錫文同副承旨鄭軾往至墓所僉知中樞院事金慶義率部將
 一人軍士一百五十護衛○發引儀前期析暗于社稷俟遣奠畢昇
 梓室官進輔於殯宮階下南向魂帛舉陳於輔南書筵官進當
 靈座前北向俯伏跪此後請降座升舉俯伏與內侍以平時冊
 謚冊謚印哀冊授執事者各置於腰舉其案授捧人內直別監捧香
 爐香合置於香亭挾持其案授捧人大祝捧魂帛函安於腰舉神主匱置
 其後內侍捧腰舉由中門出書筵官進當梓室前北向請升輔俯
 伏與內侍捧銘旌降階贊成帥昇梓室官及內侍捧梓室降皆升
 輜覆以素錦褚內外皆哭官人乘馬哭從不絕聲內侍哭步從

宗親全數議政府六曹臺諫諸司各一員奉常寺洞口序立墓所
 至圖繞謀議政府六曹臺上經至路祭所並白衣烏角帶烏紗

同帽下書筵官前導忠義衛以嬰障梓室舉士捧輔銘旌先行

授忠義衛跌至敦義門外皆權書筵官進當魂帛舉前請降舉

升轎大祝捧魂帛函安於轎書筵官進當輔前請降輔升大舉

俯伏興贊成帥昇梓室官等捧梓室升大舉降輔升大舉時用

魂帛舉平時冊謚冊印舉哀冊舉羽葆銘旌及嬰以次陳列書

筵官進當魂帛轎前請進茲俯伏興退書筵官進當大舉前請

進茲俯伏興退儀衛導從如式吉凶儀仗執鐸者振鐸進止大

舉動大舉至路祭所大舉小留進香如儀圍繞議政府魂帛轎

至晝停所帷門外書筵官進當轎前請降轎升舉俯伏興退內

侍以腰舉進魂魄轎前大祝捧魂帛函安於腰舉至帷門內書

筵官進當舉前請降舉陞座俯伏興大祝捧魂帛函入安於帳

中靈座前一日忠扈儀仗列於帷門外左右大舉至書筵官進

當大舉前請小留俯伏興退官人下馬入次設次於帳官攸司

進饌行禮並如朝夕奠異書筵官進當靈座前請降座升舉俯

伏興內侍以腰舉進帷門內大祝捧魂帛函安於腰舉內侍捧

腰舉進轎前書筵官請降舉升轎俯伏興大祝捧魂魄函安於轎書筵官請進設書筵官進當大舉前請進設俯伏興退大

舉動儀衛導從如初官人乘馬以從至攢帷門外書筵官進當

大舉前請降舉升輔俯伏興贊成帥昇梓室官等捧梓室降舉

升輔書筵官前導忠義衛以翬障梓室舉士捧輔至帷門內書

筵官請降輔俯伏興贊成帥昇梓室官等捧梓室安於榻上設

靈座於梓室之南南向設如書筵官進當魂魄轎前請降轎升

舉俯伏興大祝捧魂魄函安於腰舉內侍捧腰舉至帷門內書

筵官請降舉升座俯伏興大祝捧魂魄函安於靈座神主匱置

其後內侍設香案於其前設銘旌於靈座之右又設謚冊謚印

哀冊於靈座之左近南又設靈寢於梓室之東如初轎舉儀仗

明器分列於帳宮帷門外左右若夜乃退宿則轎舉等物至官人入

次哭如初攸司設禮饌行祭如遣奠儀唯無讀祝節次設朝夕

奠及上食哭並如初行事執事官贊成帥昇梓室官武官書筵官

二奉平時冊謚冊謚印哀冊執事各文臣奉香爐香合內直別

監二大祝二文長外執鐸八人齋郎祝史各一○篋引班次儀前烏

杖十人忠贊分左右在儀仗之外次麒麟旗二分左右九人次

二人引二人夾中旗一人執一人引皆著青衣皮帽子引小次玄鶴旗在左白鶴旗

在右次熊骨豹骨朶子各一分左右各一人執瓜執著青衣皮帽次

令字旗二分左右次金銀鐙各一分左右次金銀立瓜各一分

左右金鼓居中鼓左二人執皆著青衣皮帽子一人前馬二匹具鞍粧居中

分左右各二人牽著青衣後同次金銀橫瓜各一分左右前馬二匹

居中分左右次雀扇四分左右青蓋二居中分左右平時冊腰

輿居中仁順府官謚冊印腰輦居中以次而行每一腰輦輦士

紫衣黑巾黑鵝髦國葬都監官二人隨之著常服紅燭籠居中

分左右權務奉持著常服魂帛腰輦居中輦士補數并三十青

燭籠二居中分左右青陽繖居中忠義衛擊執著白燭籠二居

中分左右看亭居中奉持人補數并十馬杌一居中一人執著

魂帛轎子執士補數并一百二內侍隨之青扇二居中分左右

忠義衛次火鐵籠二十分左右次方相氏車四分左右每一車

補數并十五次挽詞四十分左右次竹散馬二分

左右次青繡鞍馬六在左紫繡鞍

馬六在右次明器腰舉五居中

哀册腰舉居中

人隨之

炬三百分左右列於儀仗之外次望燭三百分左右列於儀

仗之內

亭居中

右列於執事人外

次官人次內侍

守墓官次執烏杖四人分左右次書筵及翊衛司

國葬都監次宗親及議政府六曹臺諫諸司各一員

次義禁府鎮撫二人分左右慶尚道經歷趙元祉全羅道都

事金光秀忠清道都事崔繼潼黃海道都事崔漢輔江原道都

事

補數并十五

次挽詞四十分左右

次竹散馬二分

左右次青繡鞍馬六在左紫繡鞍

馬六在右次明器腰舉五居中

哀册腰舉居中

人隨之

炬三百分左右列於儀仗之外次望燭三百分左右列於儀

仗之內

亭居中

右列於執事人外

次官人次內侍

守墓官次執烏杖四人分左右次書筵及翊衛司

國葬都監次宗親及議政府六曹臺諫諸司各一員

次義禁府鎮撫二人分左右慶尚道經歷趙元祉全羅道都

每二馬

補數并十五

次挽詞四十分左右

次竹散馬二分

左右次青繡鞍馬六在左紫繡鞍

馬六在右次明器腰舉五居中

哀册腰舉居中

人隨之

炬三百分左右列於儀仗之外次望燭三百分左右列於儀

仗之內

亭居中

右列於執事人外

次官人次內侍

守墓官次執烏杖四人分左右次書筵及翊衛司

國葬都監次宗親及議政府六曹臺諫諸司各一員

事林孝儉平安道經歷辛潤祖來會葬○庚辰正朝使金連枝等先送通事啓聞見事目曰遼東都司王祥率夏霖代之○諭平安道觀察使曰今授全思立王祥致賻黑麻布十匹白苧布十匹厚紙五卷白奏紙一百卷送于奏聞使度其行未過連山把截可入送○世子嬪及三昭訓留墓所○壬午諭忠清道觀察使盧叔全曰都節制使黃致身今以妻病來京卿兼治軍鎮之務以待其還○吏曹據內直司樽別監崔汝達等上言啓成衆官內議政府錄事百人每一年五人去官中樞院錄事百人每一年四人去官知印三十人每一年二人去官又於常數外有因別薦不計都目去官者且七品以下各品遼兒之數多故入仕未久陞至七品獨內直司樽別監則左右番各百人而每一年番各二人去官入仕十餘年至有不得補八九品者雖有用之才沉滯空老請自今都目常數外增給去官遼兒各一月一人六月一人歲季一人去官給一等祿從之○甲申葬世子于京畿高陽縣治東設遷奠其儀曰前一日忠扈衛設

吉帷宮于玄室之西南向設屏帷南置帳帷門其日設主喪及
 書筵官翊衛司位於帷門外近南西向謁者贊者位如常又設
 贊成進哀冊玉帛位於羨道之東近北西向捧哀冊玉帛官位
 於其南小退西向設主喪書筵官翊衛司位於其南西向忠扈
 衛安梓室幄次於玄室門外南向國葬都監設褥席加大棺於
 其上周迴設帷又於靈帳宮帷門外陳吉凶輦轎及儀仗明器
 如葭引儀仗司進禮饌內侍捧入設於靈座前設香爐香合并
 燭於其前奠祝文於靈座之左設尊於靈帳宮東南北向置盞
 二於尊所方相氏先至入玄室以戈擊四隅明器某某等至陳
 於玄室門外東南北上謁者引主喪及書筵官翊衛司入就位
 贊者唱跪俯伏哭主喪以下跪俯伏哭贊者唱哭止興再拜興
 平身主喪以下哭止興再拜興平身謁者引主喪詣香案前跪
 贊者唱跪書筵官翊衛司皆跪三上香酌酒奠于靈座前
 俯伏興小退跪大祝進靈座之左西向跪讀祝文訖謁者引主
 喪降復位贊者唱俯伏哭主喪以下俯伏哭盡哀贊者唱哭止

連奠
三盞

興再拜興平身主喪以下哭止興再拜興平身謂者引主喪以

下出攸司撤禮饌祝文塵於坎

丁字閣北

書筵官進當靈座前俯

伏跪請降座升舉俯伏興退內侍捧謚冊印授執事者各安於

腰舉捧香爐香合授內直別監置於香亭大祝捧魂帛函安於

舉神主匱置其後捧詣吉帷宮書筵官請降舉升座俯伏興大

祝捧魂帛函安於靈座神主櫃置其後謚冊印香爐香合置於

靈座前如儀吉仗陳於吉帷門外左右書筵官進當梓室前俯

伏請升輔即玄室俯伏興內侍捧哀冊函授執事者安於腰舉

立於輔前

至義道南捧哀冊官傳捧

執巾者以巾進贊成捧巾進拭梓室并

拂棺衣忠義衛捧銘旌前導贊成帥昇梓室官等捧梓室升輔

書筵官導梓室忠義衛以妻障梓室舉士捧楯左迴北首將即

玄室宮人皆哭

梓室至義道宮人先遷

主喪以下皆哭從輔至玄室門外幄

前捧梓室安於大棺

贊成容其梓室上下

加蓋設衽其合絳處周迴以漆

塗細布內侍覆以棺衣取銘旌去杠置於其上謂者引贊成就

進玉帛位捧哀冊官捧玉帛官隨之贊成帥昇梓室官等以輪

舉捧梓室入自羨道安於玄室內榻上北首贊成再整棺衣銘
 旌令平正贊成以哀冊入跪奠於梓室之西次以贈玉及贈帛
 函跪奠哀冊之南國葬都監提調帥其屬以黼黻敬妻畫髮樹
 於梓室兩旁次捧明器服玩入玄室各以次逐便陳之使有行
 列其不盡入者於門扉石外別作便方藏之初梓室入玄室贊
 者唱哭主喪以下俯伏哭贊者唱哭止興再拜興平身主喪以
 下興再拜興平身贊者唱俯伏哭主喪以下跪俯伏哭盡哀謂
 者引主喪以一出造墓都監提調帥其屬鎖閉玄室贊成及掌
 令並監鎖閉掌今贊成覆土九錘造墓都監帥作工續以終事
 下誌石埋於墓南近地除地玄室之左善筵官觀祠后土如儀

大舉及輔之屬於栢城內庚地焚之其通用之物則不焚執事

官贊成奉香酌酒執事六外昇梓室官武官書筵官二捧哀冊官

品大捧贈玉官工曹捧贈帛官尚衣大祝二捧謚冊印哀冊執事

者各二文臣執巾者一外司憲掌令謂者贊者○誌文曰天順

元年歲在丁丑我承天體道烈文英武殿下即祚之三年秋

九月癸亥 王世子以疾卒年二十越三月二十四日甲申以
禮葬于高陽縣蜂峴之原 王世子諱暉字原明以 世宗二
十一年戊午九月十五日丙申生寔正統之三年也舊事諸王
子夫人之將琬者必就外第 慈聖王妃特承兩宮眷愛故生
世子於禁中岐嶷夙成姿容端雅 世宗親自提抱異於諸王
孫歲乙丑春正月始拜正義大夫封桃源君景泰六年癸酉春
正月進階承憲夏四月入學尊禮師儒遜志受業宗室子弟雖
老成者莫敢望焉冬十有一月以我 殿下靖難之勲迺拜興
祿乙亥閏六月乙卯 殿下即位羣臣請早建世子用端國本
於是撰日備儀冊為 王世子遣使請命于朝帝諭曰王尚教
以忠孝以副國人之望初世子入受冊命訖即朝于王妃退又
受百官賀終始益虔羣臣相慶曰我朝鮮萬世之福也 殿下
選置師傅賓客及書筵官以盡教養之方世子亦樂學不倦引
書筵官講說者日三焉嘗讀書至舜典璣衡註其制度有難以
文字解者即與書筵官登簡儀臺觀渾天儀以與書之所載

復參證無所滯礙他凡讀書皆然疑則必問問則必審 殿下嘗以兵陣家業也不可不知親授黃石公等書朕膺聖訓造次不違故學日進以就高明 殿下嘗謁 齊陵因以大蒐 命世子居守授以符節使專裁決事皆得宜丙子夏 帝遣太監尹鳳等錫 殿下誥命丁丑夏今 皇帝遣翰林修撰陳鑑等來頒即位詔兩使見世子儀觀之美行禮之詳皆稱歎不置每日雞鳴朝於兩宮問寢視膳盡其怡愉之孝事諸父以敬友兄弟以信待左右仁而有威遇士大夫恭而有禮故人無間言且殿下嘗教之以儉約凡輿馬衣服之奉務令朴素不為侈靡故塚備元良之德得民心之歸焉其始遘疾 殿下憂甚即與之避忌于舊邸禱祀醫藥無所不用其極於是疾小愈 殿下喜之凡左右侍藥者及軍士之侍衛有勞庶士之奔走供辦者皆陞一級既而疾復劇以至不諱 殿下與王妃震悼徹膳為罷朝市五日大臣等累請進膳皆不許以素服終三十日宗親百僚下逮里巷小民莫不悲哀涕慕曰臣民之無祿也吾世子之